

清

史

稿

清史稿

列傳

文苑二

諸錦

字廷芳

厲鶚

字阮

字竹

陳

王峻

字延年

何夢瑤

字芳

許

天尺

韓

劉大槐

字宗

李錯

字元

夢

高

劉

沈炳震

字炳

曹仁虎

字

文

連

胡天游

字

袁枚

字

文

連

王又曾

字

邵齊

字

文

連

徐文靖

字

朱仕

字

文

連

蔣士銓

字

趙翼

字

文

連

嚴長明

字

姚鼎

字

文

連

宋大樽

字

章學誠

字

文

連

祁韻士

字

馮敏昌

字

文

連

清史稿

法式善

字士元  
號仙舟  
天津人

惲敬

字復玉  
號愚庵  
武進人

黎簡

字簡芳  
號簡齋  
番禺人

呂繼

字亦常  
號亦常  
番禺人

張士元

字復玉  
號愚庵  
武進人

諸錦字襲七秀水人少時家貧陋輒就讀書肆主人敬其勤學恣所觀覽顧嗣立爲之延譽名大起雍正二年進士乾隆初試鴻博授編修閉門撰述不詣權要至左贊善遂告歸著有毛詩說繫禮補亡夏小正注及絳跼閑集先是康熙己未徵博學鴻儒得人稱盛高宗御極復舉行焉內外薦達二百六十七人試列一等者五人錦第三二等十人明年補試續取四人錢塘陳兆崙仁和沈廷芳高郵夏之蓉皆試列二等者也兆崙自有傳廷芳字晚叔由監生舉鴻博授編修遷御史奏毀都城智化寺內明閣王振造像及李賢所撰頌德碑報可出爲登萊青道遷河南按察使廷芳少從方苞遊爲文無纖佻之習詩學本查慎行著隱拙齋集及十三經注疏正字續經義考等書之蓉字美寰雍正十一年進士舉鴻博以檢討典試福建又督廣東湖南學政其校士也必以通經學古爲先當時試一等者劉綸居首次則南城潘安禮金壇于振錢塘杭世駿二等

自兆崙等三人外爲無錫楊度汪河澤劉玉麟休寧汪士煌程恂錢塘陳士璠  
天台齊召南會稽周長登其續取者一等宜興萬松齡二等桐鄉朱荃南安洪  
世澤石屏張漢凡十九人惟綸玉麟官最顯而世駿召南及兆崙尤知名於世  
云

厲鶚字太鴻錢塘人家貧性孤峭不苟合始爲詩即得佳句於學無所不窺一  
發之於詩康熙五十九年李紱典試浙江得鶚卷閱其謝表曰此必詩人也亟  
錄之計偕入都尤以詩見賞湯右曾再試禮部不第乾隆元年舉鴻博誤寫論  
置詩前又報罷其後赴都銓行次天津留友人查爲仁水西莊觴詠數月不就  
選歸卒年六十一鶚搜奇嗜博楊州馬曰琯小玲瓏山館富藏書鶚久客其所  
多見宋人集爲宋詩紀事一百卷又南宋畫院錄遼史拾遺東城雜記諸書皆  
博洽詳贍詩刻鍊尤工五言有自得之趣詩餘亦擅南宋諸家之長先世本慈  
谿徙居錢塘故仍以四明山樊榭名其集云鶚嘗與趙信符曾等人各爲南宋  
雜事詩一百首自采諸書爲之注徵引浩博攷史事者重之汪沆字師李少從

鶚受詩亦試鴻博報罷其後大學士史貽直將以經學薦以母老辭同時浙江舉鴻博未錄用者符曾字幼魯官戶部郎中鄞縣陳撰最推服其詩撰字楞山毛奇齡弟子以布衣薦未就試仁和趙昱字功平貢生弟信字辰垣國學生兄弟同舉家有池館之勝喜購書連江陳氏世善堂書散出皆歸之

王岐字良齋常熟人少與同里宋君玉師事陳祖范一時並稱王宋雍正二年進士授編修歷典浙江貴州雲南鄉試乾隆初改御史拜官甫三日劾左都御史彭維新矯詐苛鄙直聲震都下以母憂去官遂不出主講安定雲龍紫陽書院其學長於史尤精地理嘗以水經正文及注混淆欲一一釐定之而補唐以後水道之遷變及地名之同異爲水經廣注手自屬稿未暇成也惟成漢書正誤四卷錢大昕謂駕三劉氏吳氏刊誤上也書法樵李北海所書碑碣盛行於時王延年字介眉錢塘人雍正四年舉人乾隆初舉鴻博後官國子監學政十七年會試以耆年督司業賜翰林院侍講銜延年史學治熟嘗補袁樞通鑑紀事本末以原書不言田制則度地居民之法亡不言漕運則鑿渠引河之利塞

不言府兵則耕牧戰守之功隳至於耶律鵬張遼海而陳邦瞻書不究其終党項虎視河湟薛應旗書不詳其始紹建安者又如此不可不亟正之也杭世駿序之比延年於唐杜君卿宋劉仲原父云晚年大學士蔣溥劉統勳皆以經學薦又自進呈所著書上嘉許焉

何夢瑤字報之南海人惠士奇視學廣東一以通經學古爲教夢瑤與同里勞孝輿吳世忠順德羅天尺蘇珥陳世和陳海六番禺吳秋一時並起有惠門八子之目雍正八年成進士出宰粵西治獄明慎終奉天遼陽知州性長於詩兼通音律算術謂蔡元定律呂新書本原九章爲之訓釋更取御製律呂正義研究八音協律和聲之用述其大要參以曹廷棟琴學爲書一編時稱其決擇精當又著算述梅氏之學兼闡數理精蘊麻象考成之旨江藩謂近世爲此學者知有法不知法之所以然知之者惟夢瑤也孝輿字阮齋乾隆元年召試鴻博未用以拔貢生廷試第五出爲黔中令治古州屯務足繭萬山中將去民攀轅曰公勞苦以衣食我皆泣下厯錦屏龍泉鎮遠諸邑皆有績卒於官天尺字

履先年十七應學使試士奇手錄其賦詩示諸生名大起徵鴻博念親老不就  
以舉人終雍正時修一統志與孝與同纂粵乘孝與忤俗被口語天尺力白之  
所居里曰石湖世以前有范石湖因稱後石湖以別之云珥字瑞一爲文長於  
序記詩有別趣書法亦工惠士奇稱之曰南海明珠舉鴻博以母老辭不試乾  
隆初鄉舉一試禮部遂不出時粵東舉鴻博者又有番禺車騰芳字圖南康熙  
末與里人許遂同徵至京後期即乞終養歸後爲海豐學官學使吳鴻雅重之  
嘗從容問其諸子頗有應試者乎騰芳以皆失學對吳益歎異焉遂字揚雲康  
熙中舉人爲清河令蠲通賦民德之坐事去職巡撫薦應鴻博格於部議未試  
歸韓海字偉五亦番禺人也雍正十一年進士官封川教諭大府欲薦應鴻博  
海賦詩以見志大府覽詩愕然遂不復強海亦旋卒

劉大槐字才甫一字耕南桐城人曾祖曰燿明末官歙縣訓導鄉里仰其高節  
其後累世皆爲諸生至大槐益有名始年二十餘入京師時方苞負海內重望  
後生以文謁者不輕許與獨奇賞大槐雍正中兩登副榜竟不獲舉乾隆元年

苞薦應詞科大學士張廷玉黜落之已而悔十五年特以經學薦復不錄久之  
選黔縣教諭數年告歸居樅陽江上不復出年八十三卒大槐修幹美髯能引  
拳入口縱聲讀古詩文聆其音節皆神會理解桐城自方苞爲古文之學同時  
有戴名世胡宗緒名世被禍宗緒博學名不甚顯大槐雖游苞門傳其義法而  
才調獨出著海峰詩文集姚鼐繼起其學說盛行於時尤推服大槐世遂稱曰  
方劉姚宗緒字襲參康熙末以舉人薦充明史館纂修雍正八年進士授編修  
遷國子監司業少孤貧母潘苦節課之嚴而有法感憤厲學自經史以逮律厯  
兵刑六書九章禮儀音律之類莫不研窮著易管洪範皇極疑義古今樂通律  
衍數度衍參注晝夜儀象說歲差新論測量大意梅胡問答九九淺說正字通  
芟誤正蒙解大學講義方輿考南河北河論膠萊河考臺灣攷兩戒辨苗疆紀  
事等書自爲詩文曰瓊隅集古藻過大槐大槐同邑門人自姚鼐外推王灼灼  
字濱麓乾隆五十一年舉人選東流教諭嘗館於歛與金榜程瑤田及武進張  
惠言諸人相友善一日見惠言黃山賦曰子之才可追古作者何必託齊梁以



下自域乎惠言遂棄僂體爲古文灼所著悔生詩文鈔鮑桂星爲刊行焉

李鐸字鐵君漢軍正黃旗人祖恆忠副都統湖廣總督輝祖子鐸娶大學士索額圖女家世貴盛其於榮利泊如也性友愛兄伊山所山仕不遂省伊山戍所累月乃歸所山罷官還無宅以己屋授之並蠲產爲清宿通管一充官庫筆帖式旋棄去乾隆元年舉鴻博未中選十五年詔舉經學大臣交章論薦以老疾辭少好山水游踪所至務窮其奇苦嗜茗爲鐵鑑瓦缶一奴負以從客江南嘗月夜挾琴客泛舟采石彈大雅之章扣舷和之水宿者皆驚起人莫測其致也錯旣以屋讓兄乃築室盤山廬青峰下閉戶耽吟罕接人事歲一至城中一二日卽去居盤山二十載而歿詩古奧峭削著隄巢集又著原易及春秋通義尙史陳景元字石閭漢軍鑲紅旗人詩擬孟郊賈島有石閭集與戴亨長海爲遼東三老亨字通乾號遂堂瀋陽人原籍錢唐父梓以事戍遼見藝術傳亨康熙六十年進士官山東齊河縣知縣以抗直忤上官解組去寄居京師家益貧晏如也爲人篤於至性不輕然諾夙敦風義其詩宗杜少陵上溯漢魏卓然名

家有慶芝堂詩集長海字涵川納喇氏滿洲鎮白旗人鎮安將軍瑪奇子例子  
蔭長海不就檄補戶部庫使又逃曰庫使司帑藏歲豐入懼焉逃死非逃富貴  
也其母賢聽之遂布衣終其身冲遠任真趣無容心博古多識嗜金石書畫當  
意則傾囊購之嘗襲裘行弔解裘以濟戚喪歸望見未見書買之復解其衣由  
是中寒疾乃夷然曰獲多矣中歲愛易水雷溪之勝築大盈菴因以爲號晚入  
京居委巷又顏其閣曰玉衡懸畫四壁對之吟諷其詩矩矱古人而不膠於固  
斷句尤冠絕一時論詩以性情爲主舉靡麗之習而空之有雷溪草堂詩乾隆  
九年卒年六十有七遼東以詩文名者又有吳麟字子瑞號晚亭滿洲鎮黃旗  
人康熙四十九年舉人授內閣中書與銛同舉鴻博與修明史纂本紀充明史  
綱目纂修官善詩文兼工山水著有黍谷山房集曹寅字棟亭漢軍正白旗人  
世居瀋陽工部尙書璽子累官通政使江寧織造有棟亭詩文詞鈔鮑鈺字冠  
亭秘書院大學士鮑承先裔乾隆初官嘉興海防同知有道腴堂全集高鶚字  
蘭墅亦漢軍旗人乾隆六十年進士有蘭墅詩鈔至道光年則有劉文麟字仙

樵遼陽人九歲能詩以進士用廣東知縣總督林則徐器之權平遠兼長樂俗悍喜械鬪文麟甫蒞任單輿遽入解之衆羅拜皆釋兵俗爲之易補文昌丁憂再選河南沈邱時患匪設方略擒其渠盜賊息迹以忤上官劾降遂歸主瀋陽書院論詩以婉至爲宗語必有寄託英光偉氣一發之於詩論者謂足繼遼東三老有仙樵詩鈔其門人王乃新字雪樵承德人亦能詩有雪樵詩賸

沈炳震字東父歸安人少喜博覽讀史於年月世系人所忽者必默識之嘗著新舊唐書合鈔紀傳以舊書爲綱分注新書爲目舊志多舛略則以新書爲綱分注舊書爲目又補列方鎮表拜罷承襲諸節目積數十寒暑乃成又著二十四史四譜一紀元二封爵三宰執四設法其體出於表歷而變其旁行斜上爲標目乾隆元年與弟炳謙皆以貢生試鴻博報罷逾年卒年五十九卒後六年侍郎錢陳羣奏進其唐書合鈔召付書局采錄唐書考證中炳謙字幼孜炳震季弟也次弟炳巽字繹旂著水經注集釋訂譌據明黃省曾刊本以己意校定之徧檢古籍錄其文字異同者間附諸家考訂之說州縣沿革則悉以今名釋

焉初未見朱謀埠本後求得多與之合同時治水經者有全祖望趙一清一清字誠夫仁和人國子監生父昱季父信見厲鶚傳一清稟其家學博極羣書水經注傳寫訛奪歐陽玄王禕稱其經注混淆祖望又謂道元注中有注一清因從其說辨驗文義離析之使文屬而語不雜又唐六典注稱桑欽所引天下之水百三十七江河在焉今少二十一水考崇文總目水經注三十六卷蓋宋代已佚其五卷此二十一水卽在所佚中於是雜采他書證以本注得潞洛等十八水又分灤水灤餘水清濁漳大小遼水增多二十一與六典注合爲水經注釋又成水經箋刊誤以正朱謀埠之失方觀承督直隸撰直隸河渠志一清所草創而戴震要刪之其自著有東潛文集

曹仁虎字來殷嘉定人少稱奇才乾隆二十二年南巡獻賦召試列一等賜舉人授內閣中書二十六年成進士選庶吉士授編修每遇大禮高文典冊多出其手擢右中允充日講起居注官累遷侍講學士五十一年視學粵東方按試連州聞母訃酷暑奔喪晝夜號泣竟以毀卒於途仁虎以文字受主知聲華冠

都下屢典文衡詩宗三唐而神明變化一洗粗率佻巧之習格律醇雅醞釀深厚爲一時所推著有宛委山房詩集蓉鏡堂文稿與王鳴盛王昶錢大昕趙文哲及吳泰來黃文蓮稱吳中七子鳴盛等四人皆自有傳泰來字企管長洲人乾隆二十五年進士用內閣中書乞病歸築遂初園於木瀆藏書多宋元善本畢沅延主關中及大梁書院與洪亮吉輩往還唱和其詩一本漁洋著有淨名軒硯山堂等集文蓮字芳亭上海人官知縣有聽雨集

胡天游字稚威山陰人初姓方名遊副榜貢生乾隆元年尙書任蘭枝薦舉鴻博次年補試鼻觚大作投卷出時四方文士雲集京師每置酒高會分題命賦天游輒出數千言沈博絕麗見者咸驚服性耿介公卿欲招致一見不可得後舉經學再報罷客山西卒著有石笥山房集自言古文學韓愈然往往澀險似劉蛻非其至也儼體文自三唐而下日趨頽靡清初陳維崧毛奇齡稍振起之至天游輿衍入古遂臻極盛而邵齊燾孔廣森洪亮吉輩繼起才力所至皆足名家後數十年而有鎮洋彭兆蓀以選聲鍊色勝名重一時兆蓀字湘涵少有

才名久困無所遇舉道光元年孝廉方正胡克家爲江蘇布政使客其所時總督以國用不足議加賦兆蓀爲克家力陳其不可事得寢又偕顧廣圻同校元本通鑑及文選世稱其精槩晚依曾煥兩淮鹽運使署著小謨觴館集煥爲點定之

袁枚字子才錢塘人幼有異稟年十二補縣學生弱冠省叔父廣西撫幕巡撫金鉉見而異之試以銅鼓賦立就甚瑰麗會開博學鴻詞科遂疏薦之時海內舉者二百餘人枚年最少試報罷乾隆四年成進士選庶吉士改知縣江南歷溧水江浦沐陽調劇江甯時尹繼善爲總督知枚才枚亦遇事盡其能市人至以所判事作歌曲刻行四方枚不以吏能自喜既而以疾家居再起發陝西丁父憂歸遂牒請養母卜築江甯小倉山號隨園崇飾池館自是優游其中者五十年時出游佳山水終不復仕盡其才以爲文辭詩歌名流造請無虛日談諧詆蕩人人意滿後生少年一言之美稱之不容口篤於友誼編修程晉芳死舉借券五千金焚之且恤其孤焉天才穎異論詩主抒寫性靈他人意所欲出不

達者悉爲達之士多効其體著隨園集凡三十餘種上自公卿下至市井負販皆知其名海外琉球有來求其書者然枚喜聲色其所作亦頗以滑易獲世譏云卒年八十二晉芳字魚門江都人家世業嵯乾隆初兩淮殷富程氏尤豪侈晉芳獨好儒購書五萬卷不問生產罄其貲少問經義於從父廷祚學古文於劉大櫟而與袁枚商盤諸人往復唱和甚相得也乾隆七年召試授中書十七年成進士以吏部員外郎爲四庫館纂修書成改編修晚歲益窮官京師至不能舉火就畢沅謀歸計抵關中一月卒年六十七晉芳於易書詩禮皆有撰述又有諸經答問羣書題跋鼓園詩文集張問陶字仲冶遂甯人大學士鵬翮玄孫以詩名書畫亦俱勝乾隆五十五年進士由檢討改御史復改吏部郎中出知萊州府忤上官意遂乞病游吳越未幾卒於蘇州始見袁枚枚曰所以老而不死者以未讀君詩耳其欽挹之如此著有船山集兄問安字亥白舉人居奉母淡於榮利其詩才超逸與問陶有二難之目

王又曾字受銘秀水人乾隆十六年南巡召試賜舉人授內閣中書十九年成

進士授刑部主事同縣錢載論詩宗黃庭堅務絕深鑿險不墮白科又曾與朱沛然陳向中祝維詰和之號南郭五子又有萬光泰汪孟錫仲鈔皆與同時相鏃厲力求捐棄塵瑩母一語相襲取爲詩不異指趣亦不同體格時目爲秀水派而又曾與維詰光泰尤工又曾卒其子復乞職定其詩號丁辛老屋集畢沅爲之序謂於漢魏六朝及唐宋諸家外能融會變化自成一家取材於衆所不經見用意於前人所未發尤又曾所獨到云維詰字宣臣乾隆三年舉人官內閣中書有綠谿詩鈔光泰字循初乾隆元年舉人有柘坡居士集維詰詩全祖望稱其俊雅李錯稱其醇靜光泰詩杭世駿稱其秀朗載亦稱其綺麗蓋雖宗庭堅而鍛鍊精到絕無西江槎枒詰屈之習沛然舉人知高安縣卒官向中客死涼州詩傳者差少孟錫進士吏部主事仲鈔舉人皆有集而復與載子世錫維詰子詰相與稱詩守家法世錫已見載傳有興山老屋集復字敦初官河南鄆陵知縣有樹萱堂晚晴軒二集沅採入吳會英才集詰字明甫乾隆二十五年舉人有西澗詩鈔孟錫子如洋乾隆四十五年會試廷試皆第一亦與復等



唱和

邵齊燾字叔六昭文人幼異敏甫受書即能了大義乾隆七年進士以編修居詞館十年嘗獻東巡頌時稱班揚之亞羣公爭欲致門下齊燾意度夷曠殊落也年三十六即罷歸自顏其室曰道山祿隱主常州龍城書院洪亮吉黃景仁皆從受學善爲儷體文氣格排募意欲矯陳維崧吳綺章藻功三家之失卒年五十有二著玉芝堂集王太岳字基平定興人齊燾同年進士授檢討由侍讀出補甘肅平慶道調西安遷湖南按察使調雲南擢布政使坐事落職命充四庫館總纂官四十三年仍授檢討後遷司業卒太岳蒞官有惠政尤留心水利與齊燾最善駢文清剛簡直亦相近有清虛山房集吳錫麒字穀人錢塘人性至孝乾隆四十年進士授編修累遷祭酒以親老乞養歸主講揚州安定樂儀書院錫麒工應制詩文兼善倚聲浙中詩派前有朱彝尊查慎行繼之者杭世駿厲鶚二人殂謝後推錫麒藝林奉爲圭臬焉著有正山房集全椒吳鼎嘗輯錄齊燾亮吉錫麒及劉星煒袁枚孫星衍孔廣森曾燠之文爲八家四六云

此八家外有金匱楊芳燦與弟揆並負時名芳燦字蓉裳母夢五色雀集庭樹而生詩文華瞻學使彭元瑞大異之乾隆四十二年拔貢生廷試得知縣補甘肅之伏羌回民田五反縣民馬稱驥應之未發芳燦從稱驥甥馬映龍偵得立捕斬之因城守賊奄至以無應解圍去憾映龍洩其謀揚言映龍故與通約五日後獻城也阿桂逮映龍將殺之卒以芳燦言得免敘功擢知靈州顧不樂外吏入貲爲戶部員外郎與修會典益務記覽爲詞章嘗曰色不欲麗氣不欲縱沈博奧衍斯駢體之能事矣丁母憂貧甚露書以歸著芙蓉山館詩文鈔揆字荔裳乾隆中召試舉人授中書從福康安征衛藏官至四川布政使有藤花館稿廂字山尊嘉慶四年進士終侍講學士以母老告歸主講揚州亦長駢體有夕蔡書屋集

徐文靖字位山富埜人父章達以孝義稱鄉里文靖務古學無所不窺著述甚富皆援據經史雍正改元年五十七始舉江南鄉試侍郎黃叔琳典試還朝以得三不朽士自矜蓋指文靖及任啟運陳祖范也乾隆改元試鴻博不遇詹事

張鵬翀以所著山河兩戒考管城碩記進呈賜國子監學正十七年徵經學入都會開萬壽恩科遂與試年八十六以老壽賜檢討給假歸卒年九十餘其所著又有周易拾遺禹貢會箋竹書統箋諸書趙青黎字然一涇縣人九歲能文乾隆元年舉會試第一選庶吉士授編修充浙江鄉試考官遷御史再充浙江考官母憂歸服闋還臺又充湖南考官在臺前後五年有直聲如請清屯田歸運丁弛米禁濟民食提耗羨歸公興西北水利又勅總督高斌侍郎周學健奏開捐例啓言利之端爲害甚大所言能持大體不爲激切之論尋以耳疾乞休年八十餘卒青黎外和內嚴以不欺爲主受古文義法於方苞苞稱及門中如青黎者可信其操行之終不迷著有漱芳居集讀左管窺於春秋二百四十二年穿穴甚深先是青黎同郡以史學稱者推南陵汪越字師退康熙四十四年舉人食貧厲節守令咸折節致敬不妄干謁著綠影草堂集沖淡典博其讀史記十表排比舊文鈎稽微義所得尤多

朱仕琇字斐瞻建甯人資性朗悟而記誦拙日可數十言援筆爲文輒立就從

南豐汪世麟學古文臨別請益世麟曰子但通習諸經則世無與抗矣仕琇驚詫其言遂以已意求之經傳旁及百家諸子書一以昌黎爲宗副都御史雷鉉見其文歎爲醇古冲澹近古大家自是名大著乾隆九年舉鄉試第一踰四年成進士選庶吉士散館出知夏津縣民爲之謠曰夏清我公能在任七年以河決改福甯府教授歸主鰲峯講席者十年卒年六十六仕琇以古文辭自力其意欲追古之立言者以爲清穆者惟天澹泊者惟水含之咀之得其妙以爲文者惟人嘗與友人書曰爲文在先高其志其心有以自得則吾心猶古人之心也以觀古人之言猶吾言也然後辨其是非焉究其誠僞焉定其高下焉如黑白之判於前矣於是順其節次焉還其訓詁焉沈潛其義蘊焉調和其心氣焉久則自然合之又久則變化生之於是文之高也如累土之成臺如鴻漸之在天有莫知其所以然者仕琇與大興朱筠及弟珪友善筠推服其文甚至著梅崖文集福建古文之學自仕琇其後再傳有高澍然字雨農光澤人嘉慶七年舉人授內閣中書未幾移病歸研說經傳尤篤嗜昌黎集其文陳義正言不過

物高視塵埃之表名不如仕琇要其自得之趣有不求人知能自樹立者著春秋釋經論語私記韓文故及抑快軒文集

蔣士銓字心餘鉛山人家故貧四歲母鍾氏授書斷竹篴爲點畫攢簇成字教之既長工爲文喜吟詠由舉人官中書乾隆二十二年成進士授編修文名藉甚茲曰修彭元瑞並薦其才旋乞病歸帝屢從元瑞詢之元瑞以士銓母老對帝賜詩元瑞有江西兩名士之句士銓感恩眷力疾起補官記名以御史用未幾仍以病乞休遂卒年六十二士銓賦性俳惻以古賢者自厲急人之難如不及詩詞雄傑至敘述節烈能使讀者感泣著忠雅堂集少時與武甯汪朝南昌楊厚爲昆弟交出入必偕財物與共輒字魚亭優貢生屋字子載舉人本天全六番招討宣慰使孫雍正初改土歸流安置江西遂爲南昌人詩名與輒相埒士銓甚推服之同時有南豐趙由儀字山南與士銓等並稱四子其後繼起者曰東鄉吳嵩梁臨川樂鈞嵩梁字蘭雪以舉人官中書選知黔西州著香蘇山館集聲播外夷朝鮮吏曹判書金魯敬以梅花一詠供奉之稱爲詩佛日本賈

人斥四金購其詩扇其名重如此鈞初名宮譜字元淑嘉慶六年舉人與嵩梁同爲翁方綱弟子著青芝山館集

趙翼字耘松陽湖人生三歲能識字年十二爲文一日成七篇人奇其才乾隆十九年由舉人中明通榜用內閣中書入直軍機大學士傅恆尤重之二十六年復成進士殿試擬一甲第一王杰第三高宗謂陝西自國朝以來未有以一甲一名及第者遂拔杰而移翼第三授編修後出知鎮安府粵民輸穀常社倉用竹筐以權代概有司因購馬濟滇軍別置大筐斂穀後遂不革民苦之翼聽民用舊筐自權持羨去民由是感激每出行爭肩輿過其村先是鎮民付奉入雲南土富州爲姦捕獲百餘人付奉順逸去前守以是罷官已而付奉死驗其尸良是總督李侍堯疑其爲前守道地翼中辨總督怒劾之適朝廷用兵緬甸命翼赴軍贊畫乃追劾疏還傅恆既至滇經略兵事議以大兵渡戛鳩江別遣偏師從普洱進翼謂普洱距戛鳩江四千餘里不如由江東岸近地取猛密如其策入告其後戛鳩兵遭瘴多疾病而阿桂所統江東岸一軍獨完卒以蕞事

尋調守廣州擢貴西兵備道以廣州獄獄舊案降級遂乞歸不復出五十二年  
林爽文反臺灣侍堯赴閩治軍邀翼與俱時總兵柴大紀城守牛載以易子析  
骸入告帝意動諭大紀以兵護民內渡侍堯以詢翼翼曰總兵欲內渡久矣憚  
國法故不敢今一棄城則鹿耳門爲賊有全臺休矣即大兵至無路可入宜封  
還此旨侍堯悟從之明日接追還前旨之諭侍堯膺殊賞而大將軍福康安續  
至遂得由鹿耳門進兵破賊皆翼計也事平辭歸以著述自娛尤邃史學著廿  
二史劄記皇朝武功紀盛陔餘叢考簪曝雜記甌北詩集嘉慶十五年重宴鹿  
鳴賜三品銜卒年八十六同時袁枚蔣士銓與翼齊名而翼有經世之略未盡  
其用所爲詩無不如人意所欲爲亦其才優也其同里學人後於翼而知名者  
有洪亮吉孫星衍趙懷玉黃景仁楊倫呂星垣徐書受號爲毘陵七子亮吉星  
衍懷玉自有傳景仁字仲則武進人九歲應學使者試臨試猶蒙被索句後以  
母老客遊四方覓升斗爲養朱筠督學安徽招入幕上已脩楔賦詩太白樓景  
仁年最少著白紵立日影中頃刻成數百言坐客咸輟筆時士子試當塗聞使

者高會畢集樓下咸從奚童乞白給少年詩競寫名大噪嘗自恨其詩無幽并豪士氣遂遊京師高宗四十一年東巡召試二等武英殿書簽例得主簿陝西巡撫畢沅奇其才厚贊之援例爲縣丞銓有日矣爲債家所迫抱病逾太行道卒亮吉持其喪歸年三十五著兩當軒集子乙生通鄭氏禮善書早卒倫字敦五乾隆中進士蒼梧縣知縣著有杜詩鏡詮星垣字叔諾大學士宮五世孫乾隆五十年辟雍禮成進頌冊欽取一等一名選訓導後官河間縣知縣有白雲草堂集書受副貢生葉縣知縣有教經堂集

嚴長明字道甫江甯人幼奇慧年十一爲李紱所賞告方苞曰國器也遂從苞受業尋假館揚州馬氏盡讀其藏書高宗二十七年南巡以諸生獻賦賜舉人用內閣中書入軍機長明通古今多智數工於奏牘大學士劉統勳最奇其才戶部奏天下錢糧雜項名目繁多請併入地丁徵收長明曰今之雜項折徵銀皆古正供也若去其名他日吏忘之謂其物官所需必且再徵是使民重困也統勳曰善乃奏已之大學士溫福征大金川欲長明從行長明固辭退有咎之



者答曰是將敗沒吾奈何從之既而溫福果軍潰以死隨往者皆盡長明在軍機七年幹敏異衆然亦以是見嫉其救羅浩源事人尤喜稱之浩源雲南糧道也分償屬吏汪應徽所虧帑金有詔逾期即誅浩源徽不如數逾期十日牒請弛限上下其議時統勳主試禮部秋曹無敢任其事者長明因撾鼓入闈見統勳爲言汪已捐復將曳組綬出都獨坐浩源義未協宜仍責汪自繳統勳曰具疏稿乎曰具即振袖出之辭義明晰疏入報可獄遂解其他事多類此人有圖其像祀之者三十六年擢侍讀營扈蹕木蘭大雪中失橐馳並所裝物越日故吏以馳至問何以知爲吾物曰軍機官披羊裘者獨君耳長明勞而遣之後以憂歸遂不復出客畢沅所爲定奏詞又主講廬陽書院博學強記所讀書或舉問無不能對爲詩文用思周密和易而當於情著毛詩地理疏證五經算術補正三經三史答問石經考異漢金石例獻徵餘錄等書子觀字子進嗜學好金石文字父乞歸後築歸求草堂藏書二萬卷觀丹黃幾滿著江甯金石記錢大昕甚高其品節

姚鼎字姬傳桐城人刑部尙書文然元孫乾隆二十八年進士選庶吉士改禮部主事歷充山東湖南鄉試考官會試同考官所得多知名士四庫館開充纂修官書成以御史記名乞養歸鼎工爲古文康熙間侍郎方苞名重一時同邑劉大槐繼之鼎世父範與大槐善鼎本所聞於家庭師友間者益以自得所爲文高簡深古尤近歐陽修曾鞏其論文根極於道德而探原於經訓至其淺深之際有古人所未嘗言鼎獨抉其微發其蘊論者以爲辭適於方理深於劉三人皆籍桐城世傳以爲桐城派鼎清約寡欲接人極和藹無貴賤皆樂與盡懽而義所不可則確乎不易其所守世言學品兼備推鼎無異詞嘗仿王士禛五七言古體詩選爲今體詩選論者以爲精當云自告歸後主講江南紫陽鍾山書院四十餘年以誨迪後進爲務嘉慶十五年重赴鹿鳴加四品銜二十年卒年八十有五所著有九經說十七卷老子莊子章義惜抱軒文集二十卷詩集二十卷三傳補注三卷法帖題跋二卷筆記四卷子景衡舉人知縣有雋才鼎故工書景衡學其筆法能亂眞吳定字殿麟歙縣人舉孝廉方正與姚鼎相友

善論文嚴於法肅每爲文示定定所不可必盡言得當乃止定嘗語陳用光曰先生虛懷善取爲文尙如是其爲學可知矣著有周易集注十卷紫石山房文集十二卷詩集六卷魯九臯原名仕驥字挈非新城人嘗從肅問古文法又使其甥陳用光及肅門乾隆三十六年進士選山西夏縣以積勞致疾卒所著曰山木居士集用光字碩士嘉慶六年進士由編修累官禮部侍郎篤於師友誼嘗爲姚魯兩師置祭田以學行重一時著有太乙舟文集當嘉道間傳古文法者有宜興吳德旋上元梅曾亮諸人曾亮自有傳德旋字仲倫諸生以古文鳴與陽湖惲敬永福呂璣以文相砥鏃詩亦高澹絕俗有初月樓集

宋大樽字左彝仁和人弱歲刲股愈母疾讓產其弟乾隆三十九年舉人爲國子監助教以母老引疾歸豪於飲酒善鼓琴時時出游佳山水助其詩興其詩由唐人而上溯之極於古歌謠而止才力足以相儷有茗香論詩學古集牧牛村舍詩鈔同縣錢林字金粟嘉慶十三年進士由編修至侍讀學士左遷庶子林熟於本朝名臣言行及河漕鹽樵錢法諸大政詩亦醞釀於漢魏六朝阮元

督學浙江稱爲華實兼茂之士著文獻徵存錄玉山草堂詩集端木國瑚青田人青田故產鶴國瑚生而清傲似鶴其大父字之曰鶴田阮元督學得之恆誇示人曰此青田一鶴也命賦使署定香亭賦成一時傳誦國瑚好學深思通天文之奧嘗被召相山陵叙勞官中書道光十三年進士選用知縣性不耐劇投牒就原官著周易指屬稿二十六年而後成詩才清麗有太鶴山人集又著周易葬說地理元文後頗悔之不輕爲人營葬吳文溥字澹川嘉興貢生亦以詩名其爲人有輟略超然不羣能作蘇門長嘯著南野堂集

章學誠字實齋會稽人乾隆四十三年進士官國子監典籍自少讀書不甘爲章句之學從山陰劉文蔚童鉅游習聞戢山南雷之說熟於明季朝政始末往往出於正史外秀水鄭炳文稱其有良史才繼游朱筠門筠藏書甚富因得縱覽羣籍與名流相討論學益宏富著文史通義校讐通義推原官禮而有得於向歆父子之傳其於古今學術輒能條別而得其宗旨立論多前人所未發嘗與戴震汪中同客馮廷丞寓紹台道署廷丞甚敬禮之學誠好辯論勇於自信

有寶齋文集視唐宋文體夷然不屑所修和州亳州永清縣諸志皆得體要爲世所推章宗源字逢之乾隆五十一年大興籍舉人其祖籍亦浙江也嘗輯錄唐宋以來亡佚古書欲撰隋書經籍志考證積十餘年始成稿爲仇家所焚僅存史部五卷後百有餘年有姚振宗字海槎山陰人著漢藝文志隋經籍志考證能訂宗源之失又補後漢三國兩藝文志目錄之學卓然大宗論者謂足紹二章之傳而學誠同時有歸安吳蘭庭字省石乾隆三十九年舉人稽古博聞多所纂述嘗以宋吳縝著有五代史記纂誤因更取薛居正舊史參校爲纂誤補四卷同邑丁杰遂於經蘭庭熟於史一時有丁經吳史之目嘉慶元年與千叟宴他所著又有五代史考異讀通鑑筆記南書草堂集

祁韻士字鶴皋壽陽人乾隆四十三年進士官編修擢中允大考改戶部主事嘉慶初以郎中監督寶泉局局庫虧銅案發戍伊犁未幾赦還卒於保定書院年六十五韻士幼喜治史於疆域山川形勝古人爵里名氏靡不記覽弱冠館靜樂李氏李藏書十餘楹多善本韻士寢饋其中五年益賅治既入翰林充國

史館纂修時創立蒙古王公表傳計內札薩克四十九旗外札薩克喀爾喀等二百餘旗以至西藏及回部糾紛雜亂皆無文獻可徵據乃悉發庫貯紅本尋其端緒每於灰塵坐積中忽有所得如護異聞各按部落立傳要以見諸實錄紅本者爲準又取皇輿全圖以定地界方向其王公支派源流則核以理藩院所存世譜八年而後成書又別撰藩部要略以年月編次蓋傳仿史記而要略仿通鑑李兆洛序之謂如讀遼皇之書觀鴻濛開闢之規模矣及成伊犁有所纂述大興徐松續修之成新疆事略韻士又著西域釋地西陲要略皆考證古今簡而能核外有萬里行程記己庚編書史輯要詩文集張穆字石洲平定州人道光中優貢生善屬文歙縣程恩澤見之驚曰東京崔蔡之匹也通訓詁天算輿地之學著蒙古游牧記用史志體韻士要略用編年體論者謂二書足相埒又以魏書地形志分併建革一以天平元象興和武定爲限純乎東魏之志其雍秦諸州地入西魏者遂悅失踏駁不可讀乃更事排纂書未成其友何秋濤爲補輯之又著顧炎武閩若璵年譜月齋詩文集秋濤字願船光澤人道光

二十四年進士授刑部主事留心經世之務以俄羅斯與中國壤地連接宜有專書資考鏡始著北徼彙編六卷後復詳訂圖說起漢晉訖道光增爲八十卷文宗垂覽其書賜名朔方備乘召見擢員外郎懋勤殿行走旋以憂去同治改元年三十九卒又著王會篇箋釋一鑑精舍甲部彙刑部奉敕撰律例根源亦秋濤在官時創彙云

馮敏昌字伯允欽州人童年補諸生翁方綱按試廉州以拔貢選入國學乾隆四十三年進士授編修大考改戶部主事調補刑部性至孝友聞父喪一痛嘔血大雪徒跣竟日方綱憂曰敏昌萬無生理則持其母夫人書促令歸省及丁內艱廬墓久遂不復出平生足跡半天下嘗登岱題名絕壁游廬阜觀瀑布抵華嶽攀鐵絳躋磴峽在河陽時親歷王屋大行諸山又以北嶽去孟縣不千里騎駿馬直造曲陽飛石之巔窮雁門長城而返最後宿南嶽廟升祝融峯觀雲海其悱惻之情曠逸之抱一寓於詩著有小羅浮草堂詩集孟縣志華山小志河陽金石錄學者稱魚山先生其後嶺南以詩名家者有嘉應宋湘字煥襄嘉

慶四年進士以編修典試四川貴州出知曲靖府教屬地種木棉人稱宋公布  
署廣南永昌皆有績永昌滑甸土州知州死遠族景在東謀襲其職據境專殺  
自恣如是者五六年當事怯莫敢發民夷赴懇湘請諸鎮帥不允乃率僚屬游  
譙棲賢山從容賦詩密約鄉兵乘夜兼行出不意禽在東斬之費銀八千兩不  
取償公家邊隅以靖終湖北督糧道詩學少陵有不易居集敏昌同時又有趙  
希璜字渭川長甯人少讀書羅浮山與順德黎簡友善乾隆四十四年舉人知  
安陽縣邑志久未修希璜聘武億共成之紀昀推其體例合古法末附金石錄  
十二卷尤精確希璜工詩著有四百三十二峯草堂詩鈔

法式善字開文蒙古烏爾濟氏隸內務府正黃旗乾隆四十五年進士授檢討  
遷司業五十年高宗臨雍率諸生七十餘人聽講禮成賞賚有差本名運昌命  
改今名國語言竭力有爲也由庶子遷侍讀學士大考降員外郎阿桂薦補左  
庶子性好文以宏獎風流爲己任顧數奇官至四品即左遷其後兩爲侍講學  
士一以大考改贊善一坐修書不謹貶庶子遂乞病歸所居後載門北明李東



陽西涯舊址也構詩龕及梧門書屋法書名畫盈棟几得海內名流詠贈即投詩龕中主盟壇坫三十年論者謂接迹西涯無愧色著清秘述聞槐廳載筆存素堂詩集平生於詩所激賞者舒位王雲孫原湘作三君子詠以張之然位艷曇狂惟原湘以才氣寫性靈能以韻勝著天真閣集原湘字子瀟昭文人嘉慶十年進士選庶吉士未仕同時江蘇與原湘負才名者有吳江郭燾字祥伯附監生一眉瑩自如雪風采超俊家貧客遊人爭倒屣詩學李長吉沈下賢詞尤清婉著靈芬館集嘗病潘昂霄金石例之隘因據洪氏隸釋爲金石例補又撰詞品十二則以繼司空表聖之詩品

惲敬字子居陽湖人幼從舅氏鄭環學持論能獨出己見乾隆四十八年舉人以教習官京師時同縣莊述祖獻可張惠言海鹽陳石麟桐城王灼集輦下敬與爲友商榷經義以古文鳴於時既而選令富陽銳欲圖治不隨羣輩俯仰大吏怒其強項務裁抑之令督解黔餉敬曰王事也怡然就道後遭父喪服闋選新喻吏民素橫暴繩以法人疑其過猛已乃進秀異士與論文藝俗習大變調

知瑞金有富民進千金求脫罪峻拒之關說者以萬金相啗敬曰節士苞苴不逮門吾豈有遺行耶卒論如法由是廉聲大著卓異擢南昌同知敬爲人負氣所至輒忤上官以其才高優容之然忌者遂銜之次骨最後署吳城同知坐姦民誣訴隸詐財失察被劾忌者聞而喜曰惲子居大賢乃以賊敗耶敬旣罷官益肆其力於文深求前史興壞治亂之故旁及縱橫名法兵農陰陽家言會其友惠言歿於是敬慨然曰古文自元明以來漸失其傳吾向所以不多爲者有惠言在也今惠言死吾安敢不併力治之其文蓋出於韓非李斯與蘇洵爲近卒年六十一著大雲山房稿其治獄曰子居決事附集後趙懷玉字億孫武進人尙書中書四世孫乾隆中召試舉人授中書久之出爲青州府同知以憂歸終於家性坦易工古文辭嘗自言不敢好名爲欺人之事不敢好奇爲欺世之學惲敬稱其文無有雜言詖義離眞反正者著有生齋文集

黎簡字簡民順德人十歲能詩益都李文藻令朝陽見簡詩曰必傳之作也勸令就試學使李調元得其擬昌黎石鼎聯句奇賞之補弟子員人號之曰黎石

鼎久之膺選拔尋丁外艱遂終於家足不踰嶺海內名流欽其高節袁枚負盛名游羅浮邀與相見謝不往也著五百四峰草堂詩文鈔所與交同邑張錦芳黃丹書番禺呂堅皆以詩名錦芳字槃夫乾隆中進士官編修通說文喜金石文字弟錦麟字瑞夫舉人兄弟並爲翁方綱所器異錦麟以賦碧天如水雁初飛句得名時呼張碧天早卒錦芳著逃虛閣詩鈔與欽州馮敏昌同邑胡亦常稱嶺南三子丹書字廷授亦以詩受知調元貢優行事親孝居喪能盡哀後舉於鄉至郡朝貴爭延之辭不就嘗曰貧與富交則損名賤與貴交則損節晚官教諭兼工書畫著鴻雪齋詩鈔堅字介卿歲貢生窮老不遇著遲刪集亦常字同謙舉人落第南歸與戴震同舟至富春江乃別舟中手寫震所著書謀刊之多噉瓜果解渴得胃寒疾抵家卒有賜書樓集

張士元字翰宣震澤人工古文辭師法歸有光歲正陳其集几上北面拜之又用歸氏評點史記法上推之左氏下逮韓歐無不合者乾隆五十三年舉人久不第留京師館董誥第八年誥主會試欲令士元出門下不能得也姚文田督

學江南士元與有舊戒諸子勿應試年老餘教諭以耳聾謝不就曰國家設學校使師弟子相從講學豈漫以廩祿振寒生哉乃歸老爛谿之上撰述自娛學者稱鱸江先生性澹泊寡交獨與王芑孫秦瀛陳用光以學問相切劘姚鼐見其文亦擬之震川卒年七十著嘉樹山房集同邑張海珊字越來張履字淵甫皆舉人海珊道光元年鄉試解首榜發已前卒其論學以宋賢爲歸又恥迂儒寡效自農田河渠兵制天下形勢所在及漕糧利弊悉心究討三吳亢旱港涸一日北風大作水入糾衆築堤儲之歲以有秋著小安樂窩集喪禮問答火攻秘錄履海珊門人也傳海珊之學尤精三禮其議禮之文皆犁然有當非徒習訓詁名物者官句容訓導著積石山房集

清史稿

列傳

文苑三

張澍

字澍

陸繼輅

字從子

鄧顯鶴

字鶴

徐松

字松

錢儀吉

字儀吉

姚椿

字椿

黃易

字中

俞正燮

字正燮

張維屏

字維屏

湯鵬

字鵬

魏源

莫與儔

字友芝

洪頤煊

字煊

周濟

字濟

李兆洛

字兆洛

包世臣

字世臣

張鑑

字鑑

董祐誠

字祐誠

潘德輿

字德輿

梅曾亮

字曾亮

龔鞏祚

字鞏祚

方東樹

字東樹

魯一同

吳敏樹

斌良

馮桂芬

張裕釗

林紓

譚瑩

周壽昌

何紹基

李慈銘

吳汝綸

張澍字介侯武威人父應舉有孝行嘉慶四年澍年十八成進士是科得人最盛澍選庶吉士文詞博麗散館改知縣初令玉屏以病歸叙防河勞選屏山攝興文丁父艱再起知永新署臨江通判坐征解緩罷官開復補瀘溪復以憂去澍性亢直所至輒有聲在黔時巡撫初彭齡過縣澍杖其僕之索金者座主蔣攸銘督四川甫下車舉劾屬吏風采嚴峻澍上書論其循情市恩黜陟不當以此官不遂務博覽經史皆有纂著遊跡半天下詩文益富留心關隴文獻蒐輯刊刻之纂五涼舊聞三古人苑續黔書秦音蜀典而姓氏五書尤為絕學自著

詩文外又有詩小序翼說文引經考證同時甘肅有與之同名者曰邢澍字雨民隋州人也兩人學派亦略相近乾隆五十五年進士官至南安知府好古博聞孫星衍輯寰宇訪碑錄多資於澍著有關右經籍考兩漢希姓錄金石文字辨異守雅堂集

莫與儔字猶人獨山州人少有志操兄歿持期服不與試嘉慶四年朱珪阮元總裁會試所拔取多樸學知名士與儔亦以是年成進士選庶吉士散館改令鹽源縣俗富民買田好擇取無稅者貧民往往粥產存賦久輒逃亡與儔責賦富人而賈其隱占罪又上言河西甯遠子稅所府隸橫征病民得裁去木裏喇嗎左所有山產銀銅布政使符縣開礦與儔持不可以爲礦山實土官經堂所據奸民所呈地圖距經堂遠實無礦開廠聚衆滋擾夷境貪小利賈大費事誠不便大吏檄與儔覆勘至則礦山果在經堂右其衆嚴兵以待既瞻與儔貌聆其溫語皆解甲羅拜縣令至土司例有供餽盡却之又懸諸禁比還老幼遮道獻酒填咽不得前舉治行卓異以父憂去母老遂請終養久之被吏部檄復起

自請改教授選遵義士人聞其至爭請受業學舍如蠶房猶不足餓居半城市  
旦暮進諸生而詔之學以盡其下焉者而已上焉者聽其自至可也程朱氏之  
論窮神達化不越灑掃應對日用之常至六藝故訓則國朝專經大師實邁近  
古其稱江閩惠陳段王父子未嘗隔三宿不言聽者如旱苗之得膏雨其後門  
人鄭珍及子友芝遂通許鄭之學爲西南大師與儔著二南近說詩文散佚友  
芝記其言行爲過庭碎錄友芝字子仙家世傳業通會漢宋工詩真行篆隸書  
不類唐以後人世爭寶貴友芝亦樂易近人癯貌玉立而介特內含道光十一  
年舉人在京師遠迹權貴胡林翼曾國藩皆其舊好留居幕府評騭書史外榮  
利泊如也咸豐時嘗選取縣令棄去至是中外大臣密疏薦其學行有詔徵至  
復謝不就卒年六十一著黔詩紀略遵義府志聲韻考略邵庭詩抄宋元舊本  
經眼錄樗齋譜注唐本說文木部箋異

陸繼輅字祁孫陽湖人幼孤生母林嚴督之非其人禁勿與遊甫成童出應試  
得識丁履恒歸告母母察其賢始令與結其後益交莊曾貽張琦惲敬洪飴孫



輩學日進嘉慶五年舉人選合肥訓導以修安徽省志敘勞遷貴溪令三年引疾歸繼輅儀幹秀創聲清如唳鶴不以塵務經心惟肆力於詩清溫多風如其人也常州自張惠言憚敬以古文名繼輅與董士錫同時並起世遂推爲陽湖派與桐城相抗然繼輅選七家古文以爲惠言敬受文法於錢伯坰伯坰親業劉大槐之門蓋其淵源同出唐宋大家以上窺史漢桐城陽湖皆未嘗自標異也繼輅著崇百樂齋集合肥學舍札記從子耀適字劭文縣學生工爲詩齊金石文字與繼輅齊名其爲人輅斂精采而遇事侃侃無所撓遊公卿間尤長尺牘嘗客陝西巡撫幕教匪反滑縣那彥成過長安聞耀適名即請見爲陳機宜數十事因屬其草以聞多施行道光初舉孝廉方正選早甯教諭卒有雙白燕堂集金石續編繼輅所鈔七家文者大槐惠言敬外則方苞姚鼐朱仕琇彭續也續字秋士長洲人品詣孤峻乾隆末窮而客死無子年四十四族子紹升曰人之弔先生者悲其窮吾獨謂先生竹柏之性有節有文采其英亦元結孟郊之匹未見其窮也有秋士遺集餘六人皆自有傳

洪頤煊字旌賢臨海人少時自力於學與兄坤煊弟震煊讀書僧寮夜就佛燈講誦不輟學使阮元招頤煊震煊就學行省名日起嘉慶六年充選拔貢生入貲爲州判權知新興縣事適阮元督粵知頤煊學優非吏才延致幕府相與諸諏經史後卒於家性喜聚書廣購嶺南舊本至三萬餘卷碑版彝器多世所罕覩著禮經宮室答問孔子三朝記管子義證漢志水道疏證讀書叢錄台州札記筠軒詩文集坤煊字載厚乾隆末以拔貢生舉鄉試題名後十餘日卒震煊字百里精選學詩才敏贈阮元修經籍纂詁十三經校勘記皆任其役後頤煊十二年充選拔生既廷試貧不克歸遂以客死著夏小正疏義

鄧顯鶴字子立新化人少與同里歐陽紹洛以詩相厲遊客四方所至傾動嘉慶九年舉人厭薄仕進一以纂著爲事繫楚南文獻者三十年學者稱之曰湘皋先生內行修事兄白首無間撫其子勤於己子尤篤於師友風義嘗以爲洞庭以南服嶺以北屈原賈誼傷心之地也歷代通人志士相望而文字湮鬱不宜乃從事搜討每得貞烈遺行於殘簡斷冊中爲之驚喜狂拜汲汲彰顯若大

譴隨其後凡所著有資江耆舊集沅湘耆舊集楚寶增輯考異武岡志寶慶志朱子五忠祠傳略及續傳明季湖南殉節傳略又易述毛詩表南村草堂詩文集共數百卷晚授寧鄉訓導卒年七十五同時萬希槐字蔚亭黃岡人以廩膳生官南漳訓導通經史百家言着十三經證異困學紀聞集證陳嵩慶推爲王氏功臣

周濟字保緒荆溪人好讀史喜觀古將帥兵略騎射擊刺藝絕精嘉慶十年進士或謂之曰對策語幸無過激濟曰始進敢敗君乎及廷對縱言天下事字逾恒格以三甲歸班選知縣改就淮安府教授上丁釋奠禮畢知府王穀就殿門外升輿濟趨前阻之知府不懌去濟遂引疾歸是秋冒賑事發自縊以下吏皆得罪濟以先去免淮南北鹽梟充斥總督係玉庭知濟能以防撫事屬之濟集營弁勸以兵法姦民皆斂迹已而歎曰鹹務不理其本徒糾私私不可勝緝也因謝去濟與李兆洛張琦包世臣訂交當是時數吳中士有裨世用者必首及世臣濟兩人濟雖以才自喜一日盡屏豪習閉門撰述成管略八十卷例精辭

潔於攻取防守地勢多發明論贊中非徒考訂已也晚復任淮安教授遵秀童教以樂舞禮成觀者盈千周天爵移督湖廣邀濟偕行道卒年五十九陳鶴字鶴齡元和人操行修潔亦精史學嘉慶元年進士以主事分工部出無車馬與棲霞牟昌裕陽山鄭士超有工部三君子之目熟於明代事輯明紀六十卷未成卒後八卷其孫克家續成之克家道光末舉人官中書後參張國樞軍事殉難贈知府銜

徐松字星伯大興人嘉慶十年進士授編修簡湖南學政坐事成伊犁松留心文獻既出關置開方小冊隨所至圖其山川曲折成西域水道記擬水經復自爲釋以比道元之注又以新疆入版圖數十年視同畿甸而未有專書乃纂述成編於建置控扼錢糧兵籍言之尤詳將軍松筠奏進其書賜名新疆方略特旨敕還御製序付武英殿刊行道光改元起內閣中書游掇郎中補御史出知榆林府未幾卒他所著有新輯注地理志集釋漢書西域傳補注唐兩京城坊考唐登科記考新疆賦共數十卷松喜延譽後進其客有沈珪者字子惇烏程

人優貢生性沈默足不越關塞好指畫絕域山川初爲何凌漢陳用光所賞拔入京師館於松松稱其地學之精歛程恩澤嘗讀西游記擬爲文疏通其說及見珪所撰西游記金山以東釋歎曰遐荒萬里在目前矣遂閣筆珪客死張穆哀其遺著爲落韻樓藁陳潮字東之泰興人通經工小篆又擅周髀之學嘗夜登高臺窺星象不寐遊京師亦卒於松寓李圖字少伯掖縣人以拔貢生官直隸無極縣知縣謝病歸圖讀書十行俱下天才卓越工詩古文詞力屏近世浮靡之習嘗曰文非司馬子長詩非蘇李不足爲師法也徐松爲濟南濼源書院山長見圖詩嘆曰三百年來無此作矣著有鴻橋齋詩文集山左稱詩者王士禎趙執信以後以圖爲巨擘云

李兆洛字申耆陽湖人嘉慶十年進士選庶吉士改令鳳臺俗獷悍多盜地接蒙城阜陽遠者至百八十里官或終任不一至兆洛親行縣辨其里落繁耗地畝廣袤饒瘠次第經理之焦岡湖漢芍陂也淮淮易爲災乃增隄防設溝閘歲以屢豐擇耆老勸民孝謹優獎之於僻遠設義學爲求良師其捕盜尤爲人所

喜稱嘗騎率健勇出不意得其魁因察而撫川之兆洛嘗曰鳳穎泗民氣可用  
揀集五千人方行天下有餘矣然唯其豪能使之官帥至千里外必客兵勢勝  
足相鈐制乃可兆洛在縣七年以父憂去遂不出主講江陰書院幾二十年以  
實學課士其治經學音韻訓詁訂與圖攷天官麻術及習古文辭者輩出如江  
陰承培元宋景昌繆尙誥六承如等皆其選也兆洛短身碩腹豹顧剛目望之  
若不可近而接人和易未嘗疾言遽色資恤故舊窮乏無不至藏書逾五萬卷  
皆手加丹鉛尤嗜輿地學其論文欲合駢散爲一病當世治古文者知宗唐宋  
不知宗兩漢因輯駢體文鈔其序略云自秦迄隋其體遞變而文無異名自唐  
以來始有古文之目而目六朝之文爲駢體爲其學者亦自以爲與古文殊路  
夫氣有厚薄天爲之也學有純駁人爲之也體格有遷變人與天參焉者也義  
理無殊途天人合焉者也得其厚薄純雜之故則於其體格之變可以知世焉  
於其義理之無殊可以知文焉文之體至六代而其變盡夫沿其流極而泝之  
以至乎其源則其所出者一也卒年七十一其自著曰養一齋集所輯有皇朝

文典大清一統輿地全圖鳳臺縣志地理韻編培元字守丹優貢生著說文引經證例續雅經滯揭槩景昌字冕之縣學生著星緯測量諸篇尙誥字正卿舉人著古韻譜雙聲譜經星攷承如及族人嚴皆貢生兆洛訂輿地圖六氏兩生所手繪也

錢儀吉字衍石嘉興人尙書陳羣曾孫父福胙侍讀學士儀吉生有五色文禽翔其室故初名遼吉後易焉嘉慶十三年進士選庶吉士改戶部主事累遷至工科給事中皆能舉其職因公罷歸儀吉治經先求古訓博考衆說一折衷本文大義不持漢宋門戶嘗著經典證文雅厭者以十九篇之次寫九百四部之文而以經籍傳注推廣之其讀史補晉兵志朔閏諸表撰三國晉南北朝會要體例視徐天麟有所出入不限斷以本書又仿宋大珪名臣琬琰碑傳集得清臣工文儒等八百餘人輯錄之爲碑傳集後卒於大梁書院年六十八從弟泰吉字警石少孤執喪盡哀禮與儀吉以學行相磨遠近盛稱嘉興二石爲詩文原本情性讀其辭知其於孝友最深也以廩貢生得海寧州學訓導居間務讀

書自經史百氏下逮唐宋以來詩文集靡不博校以其學語諸生諸生之賢且文者大附營修學宮以費所羨修海昌備志既又得民間節孝行者千餘事爲旌之曰吾職也再三請必得乃已爲訓導幾三十年不以枝官自放曠粵寇陷浙往依曾國藩卒於安慶著曝書雜志甘泉鄉人稿儀吉子寶惠泰吉子炳森皆能世其學

包世臣字慎伯涇縣人少工詞章有經濟大略喜言兵嘉慶十三年舉人大挑以知縣發江西一權新喻被劾去復隨明亮征川楚發奇謀不見用遂歸卜居金陵世臣精悍有口辯以布衣遨遊公卿間東南大吏每遇兵荒河漕鹽諸鉅政無不屈節諮詢世臣亦慷慨言之初海盜蔡牽犯上海鎮道迎世臣閱沿海島嶼見黃浦停泊商船千艘遂建海運可救漕弊之議游袁浦值河事亟策策河四略是時鹽法以兩淮爲大私梟充斥議者爭言緝私世臣擬多裁鹽官惟留運司主錢糧場大使督鹽戶不分畛域仿現行鐵硝之例聽商販領本地官印照赴場繳課買鹽州縣具詳運司存核則場官不能乾沒正課而轉輸迅速



則鹽價必銳減私鹽皆輸官課課入必倍以之津貼辦公并增輸釐科道廉俸爲計甚便其論西北水利曰今國家南漕四百萬石中歲腹田二百萬畝所產也有田四百萬畝歲入與佃半之遂當全漕先減運十之一糶其穀及運資置官屯遞減至十年則漕可罷賦可寬以其盈餘量加賦餉而官可廉兵可練不然漕東南以贍西北浮收勒折日增一日竭民力積衆怒東南大患終必在此世臣能爲大言其論書法尤精行草隸書皆爲世所珍貴著有小倦遊閣文集別編爲安吳四種齊彥槐字梅麓婺源人嘉慶十三年召試舉人明年成進士選庶吉士散館授金匱令毀淫祠歲旱勤振務擢蘇州府同知陳海運策巡撫召詰之條舉以對巡撫不能難終以更張寢其事後十餘年改行海運仍仿其法焉嘗製渾天儀中星儀并各爲之說及龍尾恒升二車便民運水又著北極星緯度分表海運南漕叢議梅麓詩文集

姚椿字春木婁縣人父令儀四川布政使又屢參戎幕椿高才博學幼隨父游歷諸行省洞知閭閻疾苦慨然欲効用於世以國子監生試京兆日與洪亮吉

楊芳燦張問陶輩文酒高會才名大起願試輒不遇既又受學於姚鼐退而發宋賢書讀之屏棄夙習壹意求道泊如也嘗得寶應朱澤懷遺著歎曰此真爲程朱之學者親詣其墓拜之申私淑之禮道光元年舉孝廉方正不就主書院講席以實學勵諸生其論文必舉桐城所稱曰好學深思心知其意又曰文之用有四曰明道曰記事曰考古有得曰言詞深美其錄清代人文八十餘卷一本此旨著有通藝閣錄晚學齋文錄順廣譽字維康平湖人優貢生舉咸豐元年孝廉方正寇亂未廷試廣譽慕其鄉張履祥陸隴其之爲人刻意厲行其治經一依程端禮讀書分年日程遺法著學詩詳說用力至勤又憫晚近喪祭禮廢恩紀衰薄昏娶僭侈逾度乃變通古禮酌時俗之宜成四禮權疑八卷姚椿推爲一時宗匠有悔過齋文稿卒於上海龍門書院

張鑑字春冶歸安人巡撫阮元築詒經精舍西湖鑑及同里楊鳳苞施國祁肄業其中皆知名嘉慶初副榜貢生元勦海寇振兩浙水災一資鑑贊畫時方議海運鑑力主之以爲河運雖安費鉅海運費省得其人熟習海道未嘗不安乃

著海運芻言凡料淺占風之法定盤望星之規放洋泊舟之處攷之甚悉侍郎英和亟稱其書道光四年河決高家堰漕運阻英和遂奏行海運多採用鑑說卒年八十三著十五經叢說西夏紀事本末眉山詩案廣證鳳苞字傳九元編經籍纂訪鳳苞與分纂熟明季事嘗爲南疆逸史跋十二篇傳於時晚館郡城陳氏其書室爲鄭元慶魚計亭人以爲元慶復生云國祁字非熊與鳳苞皆廩膳生國祁病金史蕪雜積二十餘年成金史詳校以其帙繁乃列舉條目爲金源劄記又作元遺山集箋金源雜事詩國祁工詩文善填詞家貧爲人主計市肆中有一樓顏曰吉貝居著書其中燬於火著述多燼

黃易字小松錢塘人父樹穀以孝聞工隸書博通金石易承先業於吉金樂石寢食依之遂以名家官山東運河同知勤於職事嘗得武班碑及武梁祠堂石室畫像於嘉祥乃即其地起武氏祠堂砌石祠內又出家藏精拓雙鉤銀木凡四方好古之士得奇文古刻皆就易是正以是所蓄甲於一時自乾嘉以來漢學盛行羣經古訓無可蒐輯則旁及金石嗜之成癖亦一時風尙然也瞿中溶

字木夫嘉定人爲錢大昕女夫尤邃金石之學官湖南布政司理問搜奇訪僻於人跡罕至之境所獲益多著有孔廟從祀弟子辨證漢魏蜀石經考異辨正說文地名考異古泉山館彝器圖錄錢志補正集古官印考證古鏡圖錄續漢金石文編凡二十餘種張廷濟字叔未嘉興人嘉慶三年舉鄉試第一應禮部試輒躓遂歸隱以圖書金石自娛建清儀閣藏皮古器名被大江南北沈濤字西雛與廷濟同邑嘉慶十五年舉人咸豐初署江西鹽法道粵賊攻南昌隨巡撫張芾城守圍解授興泉永道未到官卒濤尙考訂之學喜金石著常山貞石志說文古本考陸增祥字星農太倉人道光三十年一甲一名進士授修撰至辰永沅靖道踵王昶金石萃編成金石補正百二十卷凡三千五百餘通又著甄錄一卷其訂正金石款識名物何紹基服其精

董祐誠字方立陽湖人生五歲曉九九數稍長善屬文游陝西成華山神廟賦一時傳誦其學於典章禮儀輿地名物皆肆力探索而尤精厯算盡通諸家法特善深沈之思書之鈎棘難讀者一覽輒通曉復能出新意闡曲隱補罅漏嘉

慶二十三年舉人越五年卒年三十三祐誠讀諸史歷志因著三統衍補復取三統以次迄明大統萬年回回各術擬撰五十三家歷術屬稿未成其兄基誠取已成五種附水經注圖說刊之其所著算學有割圓連比例術圖解斜弧三邊求角補術堆垛求積術若干種基誠字子詵進士由刑部郎中出知開封府工詞章與祐誠文合刊曰移華館駢體文方履錢字彥聞大興人與祐誠同年舉人爲令閩中初試吏署永定里豪胡鳳兆掘族人父棺並殺其子名捕不得履錢至爲書諭之鳳兆自首遂論如法調閩縣會旱禱雨烈日中體豐碩中暑卒履錢亦以駢文著稱尤嗜金石文字所積幾萬種有伊闕石刻錄富蘄齋碑目河內縣志萬善花室集周儀暉字伯恬陽湖人嘉慶初舉人宣城訓導擢知山陽縣調鳳翔能詩有夫椒山館集其後又有吳韻鴻字嘉之道光中進士官代州知州莊縉度字眉叔進士戶部主事趙申嘉字芸西陸容字蓉卿徐廷華字子樛汪士進字逸雲周儀顥字叔程舉人即儀暉弟也號毘陵後七子其名位亞於前七子



俞正燮字理初黟縣人性強記經目不忘年二十餘北走兗州謁孫星衍時星衍爲伏生建立博士復訪求左氏後裔正燮因作邱明子孫姓氏論左山考星衍多據以折衷羣議由是名大起道光元年舉人明年阮元主會試士相謂曰理初入殼矣後竟落第其經策淹博爲他考官所乙元未之見也房考王藻嘗引爲恨正燮讀書置巨冊數十分題疏記積歲月乃排比爲文斷以己意藻爲刻十五卷名曰癸巳類稿又有存稿十五卷山西楊氏刻之弟正禧亦舉人多義行文學與正燮齊名趙紹祖字琴士涇縣人年十二受知學使朱筠補諸生筠授以說文曰讀此日無過十字讀注疏亦無過十葉必精造乃已紹祖熟於史事嘗應布政使陶澍聘修安徽省志詳瞻有法道光初年七十舉孝廉方正又十二年卒注有通鑑注商新舊唐書互證金石跋安徽金石記涇川金石記金石文正續鈔汪文臺字士南與正燮同縣相善宗漢儒以論語邢疏疏略因取證古義博采子史箋傳依韓嬰詩傳例作論語外傳見阮元十三經注疏校勘記謂有益於後學然成於衆手時有駁文別爲表識作校勘記識語寄示阮

元元服其精博禮聘之又嘗纂輯七家後漢書淮南子校勘記及脞稿皆行於世道光二十四年卒年四十九湯球字伯玕亦黔人少耽經史從正燮文臺游傳其考據之學通歷算星緯恥以藝名嘗輯鄭康成逸書九種劉熙孟子注劉珍等東觀漢記皇甫謐帝王世紀譙周古史攷傳子伏侯古今注球讀史用力於晉書尤深廣蒐載籍補晉史之闕成書數種同治六年舉孝廉方正光緒七年卒年七十八

潘德輿字四農山陽人年五六歲母病不食亦不食父咯血刲臂肉和藥進父察其色動泣曰固知兒有是也既孤大母猶在堂孝敬彌至居喪一遵禮制柴瘠儼然著喪禮正俗文祭儀爲家法撫寡妹嗣子教養盡二十年其他行多類此嘗以挽回世運莫切於文章文章之根本在忠孝源在經術其說經不祖漢宋力求古人微言大義其論治術謂天下大病不外三言曰吏曰例曰利世儒負匡濟大略非雜縱橫卽陷功利未有能破利字而成百年休養之治者道光八年舉江南鄉試第一入都座主侍郎鍾昌館德輿於家語人曰四農乃吾師

也大挑以知縣分安徽未到官卒年五十五初阮元總督漕運招之謝不往後朱桂植周天爵皆號爲名臣折節願納交德輿遠引避之以爲義無所居也天爵喟然有望塵之歎其所與遊若永豐郭儀霄建寧張際亮震澤張履益陽湯鵬歛徐寶善皆一時之選德輿詩文精深博奧有養一齋集門人清河吳昆田字雲圖舉人刑部員外郎晚年家居賊犯清河團練防守邑賴以安著漱六軒集

張維屏字子樹番禺人工詩計偕入都翁方綱賞異之與黃培芳譚敬昭稱粵東三子道光二年進士改官知縣署黃梅江水潰隄乘小舟勘災水急舟衝溜挂樹免民爲謠曰犯急湍官救民神教官調補廣濟公費一資漕折民苦之勢不可革引疾去汪廷珍語人曰縣官不願收漕世罕見也丁艱服闋願就閒援例改郡丞權南康建太白東坡祠廬山暇則集諸生談藝以風雅寓規勸焉未一載復能歸築聽松園頽然不與世事癖愛松又號松心子見松形奇古輒下拜精書法朝鮮小呂宋得其書咸寶愛之卒年八十有松心草堂集國朝詩人



徵略培芳香山人敬昭字子晉陽春人順德黎簡者以詩名海內敬昭賦鵬鶴篇投之簡歎爲異才嘉慶二十二年進士官戶部主事著聽雲樓集同時廣東以學行名者又有高要李泰來字子大生二十月能即事誦古經語無不切嘉慶十八年拔貢生絕意進取學使李棠階高其品屏騶從徒走就見詢以挽回風俗之道泰來爲書數千言復之棠階表其廬下教高要令歲時存問自惠士奇禮下胡方後此爲再見焉著端州金石略昨夢齋詩義堂各集

梅曾亮字伯言上元人少時工駢文姚鼐主講鍾山書院曾亮與邑人管同俱出其門兩人交最篤同肆力古文鼐稱之不容口名大起閒以規曾亮曾亮自喜不爲動也久之讀周秦太史公書乃頗痛一變舊習義法本桐城稍參以異己者之長選聲練色務窮極筆勢道光二年進士用知縣援例改戶部郎中居京師二十餘年與宗稷辰朱琦龍啟瑞王拯邵懿辰輩游處曾國藩亦起而應之京師治古文者皆從梅氏問法當是時管同已前逝曾亮最爲大師而國藩又從唐鑑倭仁吳廷棟講身心克治之學其於文推挹姚氏尤至於是士大夫

多喜言文術政治乾嘉考據之風稍稍衰矣未幾曾亮依河督楊以增卒年七十一以增爲刊其詩文曰柏枧山房集同字異之少孤母鄒以節孝聞同善屬文有經世之志稱姚門高足弟子嘗擬言風俗書籌積貯書爲一時傳誦道光五年陳用光典試江南同中式用光語人曰吾校兩江士獨以得一異之自慰耳用光亦鼎弟子也同卒年四十七著因寄軒集子嗣復字小異能世其業兼通算術鼎門下著籍者衆惟同傳法最早其於同里則亟稱劉開之才開字明東以孤童牧牛聞塾師誦書竊聽之盡記其語塾師留之學而妻以女年十四以文謁鼎有國士之譽盡授以文法游客公卿才名動一時年四十卒著孟塗集子繼字少塗有信義徧走貴勢求刻其父書以此孟塗集益顯寶山毛嶽生字申甫用難廢改文學生孤貧以孝聞自力於學未弱冠賦白雁詩得名亦從鼎學古文以鉤棘字句爲工有休復居集

湯鵬字海秋益陽人道光二年進士初喜爲詩自上古歌謠至三百篇漢魏六朝唐無不形規而神紫之有詩三千首既官禮部主事兼軍機章京旋補戶部

主事轉員外郎改御史意氣蹈厲其議論所許可惟李德裕張居正輩徒爲詞章士無當也於是勇言事未踰月三上章最後以言宗室尙書叱辱滿司官非國體在已奉旨處分後罷御史回戶部轉郎中是時英吉利擾海疆求通市鵬已黜不得言事猶條上三十事於尙書轉奏報聞鵬負才氣鬱不得施乃著之言爲浮邱子一書立一意爲幹一幹而分數支支之中又有支焉支幹相演以遞於無窮大抵言軍國利病吏治要最人事情僞開張形勢尋躡要眇一篇數千言者九十餘篇最四十餘萬言每遇人輒曰能過我一閱浮邱子乎其自喜如此二十四年卒同時有張際亮者亦以才氣磊落聞際亮字亨甫建寧人少孤伯兄業賈以其才資之讀書補諸生肄業福州鼇峯書院院長陳壽祺器之尋試拔貢入京師朝考報罷而時皆嘖嘖稱其詩雖使曾煥以事至召之飲煥以名輩自處縱意言論同坐贊服際亮心薄之煥食瓜子粘鬚一人起爲拈去際亮大笑衆慚旣罷復投書責煥不能教後進徒以財利奔走寒士門下煥怒毀於諸貴人由是得狂名試輒不利乃徧游天下山川窮探奇勝以其窮愁慄

慨牢落古今之意發爲詩歌益沈雄悲壯十八年鄉試者約張際亮狂士不可中而際亮已易名亨輔中式拆卷疑欲去之副考官申解而止及來謁果際亮也主試者愕然會試復報罷際亮故與桐城姚瑩善二十三年間瑩以守土事被誣下獄入都急難及事白而際亮疾篤以所著思伯子堂詩集屬瑩遂卒其後瑩子溶昌輯而刊之都三十二卷

龔鞏祚原名自珍字璵人仁和人父麗正進士官蘇松兵備道爲段玉裁婿能傳其學鞏祚十二歲玉裁授以說文部目鞏祚才氣橫越其舉動不依恆格時近俚詭而說經必原本字訓由始教也初由舉人援例爲中書道光時成進士歸本班游擢宗人府主事改禮部謁告歸遂不出官中書時上書總裁論西北塞外部落源流山川形勢訂一統志之疏漏凡五千言後復上書論禮部四司政體宜沿革者亦三千言其文字驚桀出入諸子百家自成學派所至必驚衆名聲籍籍顧仕宦不達年五十卒於丹陽書院著有尙書序大義大誓答問尙書馬氏家法左氏春秋服杜補義左氏決疣春秋決事比定菴詩文集

魏源字默深邵陽人道光二年舉順天鄉試宣宗閱其試卷揮翰褒賞名藉甚會試落第房考劉逢祿賦兩生行惜之兩生者謂源及龔鞏祚兩人皆負才自喜名亦相埒源入貲爲中書至二十四年成進士以知州發江蘇權興化二十八年大水河帥將啟閘源力爭不能得則親擊鼓制府總督陸建瀛馳勘得免士民德之補高郵坐遲誤驛遞免副都御史袁甲三奏復其官咸豐六年卒源兀傲有大略熟於朝章國故論古今成敗利病學術流別馳騁往復四座皆屈嘗謂河宜改復北行故道至咸豐五年銅瓦廂決口河果北流又作籌鹺篇上總督陶澍謂自古有緝場私之法無緝鄰私之法鄰私惟有減價敵之而已非裁費曷以輕本減價非變法曷以裁費顧承平久撓之者衆迨漢口火災後陸建瀛始力主行之源以我朝幅員廣武功實邁前古因借觀史館官書參以士大夫私著排比經緯成聖武記四十餘萬言晚遭夷變謂籌夷事必知夷情復據史志及林則徐所譯西夷四州志等成海國圖志一百卷他所著有書古微詩古微元史新編古微堂詩文集

方東樹字植之桐城人宗誠字存之從兄弟也皆諸生東樹曾祖澤拔貢生爲姚鼎師東樹既承先業更師事鼎當乾嘉時漢學熾盛鼎獨守宋賢說至東樹排斥漢學益力阮元督粵闢學海堂名流輻湊東樹亦客其所不苟同於衆以謂近世尙考據與宋賢爲水火而人類皆鴻名博學貫穿百氏遂使數十年承學之士耳目心思爲之大障乃發憤著漢學商兌一書正其違謬又著書林揚觶戒學者勿輕事著述東樹始好文事專精治之有獨到之識中歲爲義理學晚耽禪悅凡三變皆有論撰務盡言惟恐詞不達年八十卒於祁門東山書院他所著有大意尊聞向果微言昭昧詹言儀衛軒集凡數十卷東樹博極羣書窮老不遇傳其學宗誠既歿宗誠刊布其書名乃大著宗誠能古文熟於儒家性理之言欲合文與道爲一咸豐時寇亂轉徙不廢學益留心兵事吏治著俟命錄以究天時人事致亂之原大要歸於植綱常明正學志量恢如也山東布政使吳廷棟見之聘爲子師倭仁曾國藩皆因廷棟以知宗誠倭仁爲師傅寫其書數十則進御經筵國藩督直隸奏以自隨令輩強十餘年設鄉塾創敬

義書院刻邑先正遺著舉孝子悌弟節婦建義倉積穀萬石皆前此未有也國藩去李鴻章繼任亦不以屬吏待之有請輒施行嘗歲早已逾報災期手書爲民請并及鄰郡邑不以侵官自嫌卒得請普免焉舉治行卓異不赴部自免歸以學行詔後進人有一善獎譽之不容口勤於纂述逾時越月輒成帙著柏堂經說筆記文集百五十餘卷詔加五品卿銜從安徽學政請也其同縣友人又有蘇惇元字厚子戴鈞衡字存莊皆東樹弟子惇元咸豐元年孝廉方正其學近張楊園文似方望溪編有楊園望溪年譜所著曰四禮從宜遜敏錄詩文集鈞衡道光二十九年舉人自謂生方姚之鄉不敢不以古文自任與惇元重訂望溪集增集外文十之四其後榮成孫葆田更得遺稿若干篇刻之方氏一家之言備矣鈞衡有經濟才與國藩爲友著書傳補商國藩亟稱之避寇臨淮妻李妾劉皆殉難鈞衡嘔血卒年未四十有蒼州集味經山館詩文鈔魯一同字通甫清河人善屬文師事潘德輿道光十五年舉人時承平久一同獨深憂謂今天下多不激之氣積而不化之習在位者貪不去之身陳說者務

不駭之論風烈不紀一旦有緩急莫可倚仗既再試不第益研精於學凡田賦兵戎諸大政及河道遷變地形險要悉得其機牙爲文務切世情古茂峻厲有杜牧尹洙之風漕督周天爵見之曰天下大材也豈直文字哉曾國藩尤歎異之試禮部入都國藩數屏騶從就問天下事粵逆踞金陵也同年生吳棠方宰清河一同爲草檄傳示列縣辭氣奮發江北人心大定江忠源師抵廬州友人戴鈞衡爲書通國藩之指欲其起佐忠源一同謝不出復書極論用兵機宜謂當緩金陵專攻旁郡其後大兵築長圍期旦夕破金陵一同獨決其必敗未幾果潰裂蘇浙淪陷已而國藩克安慶復金陵一如所論同治二年卒年五十九著邳州志清河志通甫類稿子寶字仲實諸生文有家法善綜核知府章儀林議減清河賦苦繁重叩齎齎爲剖析條目退草三千言明且獻之儀林驚喜因請主辦三年而成又佐修安東水道役竣費無毫髮溢

譚瑩字玉生南海人弱冠應縣試總督阮元遊山寺見瑩題壁詩驚賞告縣令曰邑有才人勿失之令問姓名不答已而得所爲賦以告元元曰是矣逾年元



開學海堂課士以瑩及侯康儀克中熊景星黃子高爲學長瑩性強記述往事雖久遠時日不失博考粵中文獻友人伍崇曜富於貲爲彙刻之曰嶺南遺書五十九種曰粵十三家集曰楚南耆舊遺詩益擴之爲粵雅堂叢書瑩爲學長三十年英彥多出其門道光二十四年舉於鄉官化州訓導久之遷瓊州教授加中書銜少與侯康等交莫逆晚歲陳澧與之齊名著樂志堂集景星字伯晴亦南海人也以詩見賞於元顧其意恨文士綿弱學騎射技擊以舉人終學官無所試一假書畫自娛子高字叔立番禺人優貢生精小篆喜考證金石藏書多異本瑩子宗浚字叔裕工駢文同治十三年一甲二名進士授編修初舉於鄉齒尙少瑩課令讀書十年乃許出仕授以馬氏通考略能記誦既入翰林督學四川又充江南副考官以伉直爲掌院所惡出爲雲南糧儲道宗浚不樂外任辭不允再權按察使引疾歸鬱鬱道卒

吳敏樹字本深巴陵人父達德歲歉貸貧民穀逾萬石不償有名湖湘間敏樹生而好學爲文章力求岸異刮去世俗之見道光十二年舉於鄉時梅曾亮倡

古文義法京師傳其師姚氏學說敏樹起湖湘不與當世士接手錄明崑山歸氏文成冊既入都與曾亮語合於是京師盛傳敏樹能古文曾國藩官京師與敏樹交最篤既出治軍欲使參幕事辭不赴敏樹貌溫而氣夷意趣超曠視人世忻戚得喪無累於其心以大挑選瀏陽訓導旋自免去時登君山江樓倘佯吟嘯學者稱南屏先生著柅湖文錄卒年六十九敏樹之友以文名者曰楊彝珍字性農武陵人父丕復舉人官石門訓導著歷代輿地沿革彝珍道光末進士選庶吉士改兵部主事與曾國藩左宗棠往還好奔走聲氣重宴鹿鳴賞四品卿年九十餘卒有移芝室集

周壽昌字應甫長沙人道光二十五年進士選庶吉士授編修咸豐初海疆至侍讀時粵寇犯湖南督師賽尙阿逗遛不戰上疏劾之一時推爲敢言迨寇踞金陵分黨北犯命隨辦京畿防務鄉民十七人闖入城當事者偵獲以賊謀論壽昌廉得實趣令釋之或疑失要人旨且得罪壽昌曰我豈以人命阿權貴哉卒釋之穆宗親政疏請躬行典禮戒逸豫報聞壽昌精核強記雖宦達勤學過

諸生爲嗜班固書塗染無隙紙成漢書注校補五十卷易藥十有七又有後漢注補正三國志注證遺思益堂集官終內閣學士李希聖字亦園湘鄉人以進士官刑部主事嗜學初治訓詁通周官春秋穀梁史習新舊唐書文法騷選詩多淒艷似玉谿好讀書通古今治法慨然有經世之志嘗纂光緒會計錄以總綜財賦又草律例損益議張百熙等皆極重之光緒末卒

斌良字笠畊號梅舫瓜爾佳氏滿洲正紅旗人閩浙總督玉德子由蔭生歷官刑部侍郎爲駐藏大臣善爲詩以一官爲一集得八千首其弟法良彙刊爲抱沖齋全集稱其早年詩風華典贈雅近竹垞樊榭迨服官農部從軍減滑詩格堅老古體胎息漢魏韓杜蘇李律詩則純法盛唐秉臬陝豫奉召還都時與陳荔峰李春湖葉筠潭吳蘭雪唱酬詩境益高奉使蒙藩跋馬古塞索隱探奇多詩人未歷之境風格又一變以薩天錫元遺山自況阮元爲序亦頗稱之法良字可僉梅竹亮稱其詩學東坡得清曠之氣而運以唐賢優遊平夷之情有溫羅龔詩集錫縝原名錫淳字厚安博爾濟吉特氏滿洲正藍旗人咸豐六年進

士由戶部郎中授江西督糧道爲駐藏大臣乞病歸工書善詩文著有退復軒詩文集李雲麟字雨蒼漢軍正白旗人以諸生從曾國藩督師勦粵匪累功至副都統時新疆設布倫托海辦事大臣以雲麟任之署伊犁將軍治邊皆著績爲言官劾能雲麟性剛使氣少好遊徧歷五嶽歸著曠遊偶筆一卷紀遊詩有奇氣初謁國藩適遇其子不爲禮雲麟怒批之國藩延入謝過使獨領一軍左宗棠奏調亦稱其有將才雲麟時被酒狂言與世多忤罷歸後卒貧困死有詩集西陲西行道成以來滿洲如觀成字葦杭瓜爾佳氏有瓜亭雜錄語花館詩集鄂恒字松亭伊爾根覺羅氏有求是山房集震鈞字在廷改名唐宴瓜爾佳氏有渤海國志天咫偶聞英華字斂之赫佳氏正紅旗人博學善詩文工書法著書立說中外知名有安齋集萬松野人言善錄等蒙古盛元字愷廷巴魯特氏有南昌府志杭營小志怡園詩草漢軍宗山字獻梧魯氏有鏡生鐵齋詩集希晦堂遺文皆以詩文名

何紹基字子貞道州人尙書凌漢子道光十六年進士選庶吉士授編修紹基

承家學少有名阮元程恩澤頗器賞之歷典福建貴州廣東鄉試均稱得人咸  
豐二年簡四川學政召對詢家世學業兼及時務紹基感激思立言報知遇時  
直陳地方情形終以條陳時務降歸歷主山東濰源長沙城南書院教授生徒  
助以實學同治十三年卒年七十又五紹基通經史精律算嘗據大戴記攷證  
禮經貫通制度頗精切又爲水經注刊誤於說文攷訂尤深詩類黃廷堅嗜金  
石精書法初學顏真卿遍臨漢魏各碑至百十過運肘斂指心摹手追遂自成  
一家世皆重之所著有東洲詩文集四十卷弟紹京字子愚亦工書筆法頗似  
其兄孫維樸字詩孫以副貢爲中書累至道員工書畫字摹其祖久寓滬閩變  
後卒年八十餘與維樸同時以書名海上者李瑞清字梅盦臨川人光緒二十  
年進士選庶吉士改道員分江蘇攝江甯提學使兼兩江師範學堂監督宣統  
三年武昌亂起江甯新軍亦變合浙軍攻城官吏潛遁瑞清獨留不去仍日率  
諸生上課如常布政使樊增祥棄職走以瑞清代之急購米三十萬斛餉官軍  
助城守設平糶局賑難民城陷瑞清衣冠坐堂皇矢死不少屈民軍不忍加害

縱之行乃封藩庫以需與籍屬之士紳積金尙數十萬也自是爲道士裝隱滬上匿姓名自署曰清道人鬻書畫以自活瑞清詩宗漢魏下陟陶謝書各體皆備尤好篆隸嘗謂作篆必目無二李神遊三代乃佳丁巳復辟授學部侍郎又三年卒諡文潔

馮桂芬字林一號景亭吳縣人道光二十年一甲二名進士授編修充廣西鄉試正考官丁母憂服闋文宗御極用大臣薦召見旋丁父憂服甫闋而金陵陷詔募貲團練於鄉以克復松江府諸城功晉五品銜擢右中允赴京期年告歸同治元年以治團功加四品銜亂定復以耆宿著書裨治加三品銜桂芬少工駢體文中年後乃肆力古文辭於書無所不窺尤留意天文地輿兵刑鹽鐵河漕諸政初佐某邑令治錢穀以事不合拂衣去入兩江總督陶澍幕自未仕時已名重大江南北及粵賊陷蘇州避居上海時大學士曾國藩治軍皖疆蘇州士大夫推錢鼎銘持書乞援陳滬城危狀及用兵機宜累數千言其稿桂芬所手創也國藩讀之感動乃遣李鴻章率師東下旣解滬上圍進克蘇州皆辟以

爲助桂芬立會防局調和中外維處者設廣方言館求博通西學之才儲以濟  
變嘗從容爲鴻章言吳人棉重之苦往往因催科破家會松江知府方傳書亦  
上書謂江蘇自南宋籍沒諸王大臣田官徵其租延及元代官田民田淆亂租  
額浸淫入賦額民既苦之其後張士誠又盡攘諸豪田爲官產明太祖平吳怒  
吳人附士誠依田租私籍數定稅乃重困雍正乾隆間嘗再議減然但及地丁  
今億乘民亂後屢減浮糧疲民大悅賊勢且益衰鴻章以聞有詔減蘇松太米  
賦三之一常鎮十一著爲令桂芬性恬澹服官僅十年然家居遇事奮發不避  
勞怨凡濬河建學積穀諸舉條議皆出其手先後主講金陵上海蘇州諸書院  
與後進論學昕夕忘倦精研書數嘗以意造定向尺及反羅經以步田繪圖又  
以江南清丈用部頒五尺步弓田多溢額乃考會典定用舊行六尺步弓量舊  
田新頒者量新漲沙田著說文解字段註考證弧矢算術細草圖解西算新法  
直解校邠廬抗議顯志堂詩文集都數十卷同治十三年卒王頌蔚字芾卿長  
洲人光緒五年進士選庶吉士吳縣潘祖蔭常熟翁同龢皆稱頌蔚才散館改

官戶部補軍機章京暇輒從事著述嘗於方略館故紙堆中見殿板初印明史殘本眉上黏有黃籤審爲乾隆朝擬撰考證未竟之本因多方搜求逐條釐訂芟其繁冗采其精要成明史考證擴逸四十餘卷光緒十八年試御史第一軍機處奏留頌蔚思立言抒忠譴轉鬱鬱不樂嘗派充工程監督差例有分饋頌蔚獨卻之曰我輩取與之間貴自審慎不可隨俗浮沉昔陳稽亭先生官部曹時印結公項且猶不取矧此實爲廠商之賄賂乎二十一年中日釁起戰事多北洋大臣主之會翁同龢復入軍機乃進言曰讀聖祖高宗聖訓凡事關軍務者皆由中朝謀定後動今日戰局旣成非直隸一省事豈能悉諉之北洋乎及議和頌蔚益爲悲憤嘗曰今之敗績徒歸咎於師之不練器之不利猶非探本之論頻年以來盈廷習泄沓之風宮中務游觀之樂直臣擯棄賄賂公行安有戰勝之望此後償金旣巨民力益疲恐大亂之不在外患而在內憂矣明年卒著有寫禮廟文集詩集讀碑記古書經眼錄各一卷明史考證擴逸四十二卷葉昌熾字鞠裳元和人光緒十六年進士選庶吉士授編修累至侍講督甘肅



政邊地樸陋昌熾校閱盡職以裁缺歸著書終老國變後五年卒著有藏書紀事詩六卷語石十卷邠州大佛寺題刻考二卷均考訂精確管禮耕字申季歲貢生父慶祺從陳奐遊禮耕篤守家學尤長訓詁嘗言唐以正義立學官漢魏六朝遺說積久泰半闕不完凡所攷見獨存釋文而今本踏駁非其舊思綜稽羣籍爲校證未及半而卒袁寶璜字璣禹元和人光緒二十一年進士官刑部主事通經小學兼及算術著書亦未成而卒

李慈銘字愛伯會稽人諸生入貲爲戶部郎中至都即以詩文名於時大學士周祖培尙書潘祖蔭引爲上客光緒六年成進士歸本班改御史時朝政日非慈銘遇事建言請臨雍請整頓臺綱大臣則糾係毓汶係楫疆臣則糾德馨沈秉成裕寬數上疏均不報慈銘鬱鬱而卒年六十六慈銘爲文沈博絕麗詩尤工自成一家性狷介又口多雌黃服其學者好之憎其口者惡之日有課記每讀一書必求其所蓄之深淺致力之先後而訾隲之務得其當後進翕然大服著有越縵堂文十卷白華絳趺閣詩十卷詞二卷又日記數十冊弟子著錄數

百人同邑陶方琦爲最方琦字子珍光緒二年進士選庶吉士授編修督學湖南年四十卒於京邸方琦學有本末汲汲於古述造無間歲時治易鄭注詩魯故爾雅漢注又習大戴禮記其治淮南王書方以推究經訓蒐采許注拾補高誘再三屬草矻矻十年實事求是有淮南許注異同詁許君年表漢室文鈔駢文詩詞譚廷獻字仲脩仁和人同治六年舉人少負志節通知時事國家政制典禮能講求其義治經必求西漢諸儒微言大義不屑屑章句讀書日有程課凡所論著櫟括於所爲日記文導源漢魏詩優柔善入惻然動人又工詞與慈銘友善相唱和官安徽知歙全椒合肥宿松諸縣晚告歸貧甚張之洞延主經心書院年餘謝歸卒於家李稷勳字姚琴秀山人光緒二十四年二甲一名進士改庶吉士授編修充會試同考官精衡鑒重實學頗得知名士累官郵傳部參議總川漢路事博學善古文嘗受詩法於王闓運而不囿師說專步趨唐賢意致深婉得風人之遺慈銘嘗稱賞之有晚齋詩錄四卷

張裕釗字廉卿武昌人少時塾師授以制舉業意不樂家獨有南豐集時時竊

讀之咸豐元年舉人考授內閣中書曾國藩閱卷賞其文既來見曰子豈嘗習子固文耶裕釗私自喜已而國藩益告以文事利病及唐宋以來家法學乃大進寤前此所爲猶凡近馬遷班固相如楊雄之書無一日不誦習又精八法由魏晉六朝以上窺漢隸臨池之勤亦未嘗一日輟國藩既成大功出其門者多通顯裕釗相從數十年獨以治文爲事國藩爲文義法取桐城益閔以漢賦之氣體尤善裕釗之文嘗言吾門人可期有成者惟張吳兩生謂裕釗及吳汝綸也裕釗文字淵懿厯主江甯湖北直隸陝西各書院成就後學甚衆嘗言文以意爲主而辭欲能副其意氣欲能舉其辭譬之車然意爲之御辭爲之載而氣則所以行也欲學古人之文其始在因聲以求氣得其氣則意與辭往往因之而益顯而法不外是矣世以爲知言著濂亭文集裕釗門下最知名者有范當世朱銘盤當世字肯堂江蘇通州諸生能詩汝綸嘗歎其奇橫不可敵著范伯子詩文集銘盤字曼君泰興舉人叙知州其學長於史兼工詩古文著曾會要一百卷朝鮮長編四十卷及桂之華軒詩文集與裕釗同時者有楊守敬字惺

吾宜都人爲文不足躋裕釗而其學通博精輿地用力於水經尤勤通訓詁考證金石文字能書摹鐘鼎至精工儷體爲箴銘之屬古奧聳拔文如其人以舉人官黃岡教諭加中書銜嘗遊日本搜古籍多得唐宋善本辛苦積資藏書數十萬卷爲鄂學靈光者垂二十年卒年七十有七著有水經注圖水經注要刪隋書地理志考證日本訪書志晦明軒稿鄰蘇老人題跋望堂金石集等

吳汝綸字摯父桐城人少貧力學嘗得鷄卵一易松脂以照讀好文出天性早著文名同治四年進士用內閣中書曾國藩奇其文留佐幕府久乃益奇之嘗以漢祢衡相擬旋調直隸參李鴻章幕時中外大政常決於國藩鴻章二人其奏疏多出汝綸手尋出補深州丁外內艱服除補冀州其治以教育爲先不憚貴勢籍深州諸村已廢學田爲豪民侵奪者千四百餘畝入書院資膏火聚一州三縣高材生親教課之民忘其吏推爲大師會以憂去豪民至交通御史以壞村學劾奏還其田及莅冀州仍銳意興學深冀二州文教斐然冠畿輔又開冀衡六十里之渠洩積水於滏以溉田畝便商旅時時求其士之賢有文者禮

先之得十許人月一會書院議所施爲興革於民便不便率不依常格稱疾乞休鴻章素重其人延主蓮池講席其爲教一主乎文以爲文者天地之至精至粹吾國所獨優語其實用則歐美新學尙焉博物格致機械之用必取資於彼得其長乃能共競舊法完且好吾猶將革新之況其窳敗不可復用其勤動導誘後生常以是爲說嘗樂與西士遊而日本之慕文章者亦踴海來請業會朝旨開大學堂於京師管學大臣張百熙奏薦汝綸加五品卿銜總教務辭不獲則請赴日本考學制既至其國上自君相及教育名家婦孺學子皆備禮接款求請題詠更番踵至旋返國先乞假省墓興辦本邑小學堂規制粗立遽以疾卒年六十四汝綸爲學由訓詁以通文辭無古今無中外唯是之求自羣經子史周秦故籍以下逮近世方姚諸文集無不博求慎取窮其原而竟其委於經則易書詩禮左氏穀梁四子書旁及小學音韻各有詮釋於史則史記漢書三國志新五代史資治通鑑國語國策皆有點校尤邃於史記盡發太史公立言微旨於子則老莊荀韓管墨呂覽淮南法言太玄各有評隲而最取其精者於

集則楚辭文選漢魏以來各大家詩文皆有點勘之本凡所啟發皆能得其深微整齊百代別白高下而一以貫之盡取古人不傳之蘊昭然揭示俾學者易於研求且以識夫作文之軌範雖萬變不窮而千載如出一轍其論文嘗謂千秋蓋世之勳業皆尋常耳獨文章之事緯地經天代不數人人不數篇唯此爲難又謂中國之文非徒習其字形而已綴字爲文而氣行乎其間寄聲音神采於文外雖古之聖賢豪傑去吾世邈矣一涉其書而其人之精神意氣若儼立乎吾目中務欲因聲求氣凡所爲抗隊詘折斷續欽侈緩急長短中縮抑揚頓挫之節一循乎機勢之自然以漸於精微奧安之域乃有以化裁而致於用悉舉學問與事業合而爲一而尤以淪民智自強亟時病爲兢兢云著有易說二卷寫定尙書一卷尙書故三卷夏小正私箋一卷文集四卷詩集一卷深州風土記二十二卷及點勘諸書皆行於世汝綸門下最著者爲賀濤而同時有蕭穆亦以通考據名穆字敬孚縣學生其學博綜羣籍喜談掌故於顧炎武全祖望諸家之書尤熟復多見舊槧考其異同朱墨雜下遇孤本多方勸刻所校印

凡百餘種有敬孚類彙十六卷濤字松坡武強人光緒十二年進士官刑部主事以目疾去官初汝綸牧深州見濤所爲反離騷大奇之遂盡授以所學復使受學於張裕釗濤謹守兩家師說於姚鼐義理考據詞章三者不可偏廢之說尤必以詞章爲貫澈始終日與學者討論義法不厭與同年生劉孚京俱治古文濤言宜先以八家立門戶而上窺秦漢孚京言宜先以秦漢爲根柢而下攬八家其門徑大略相同濤有文集四卷孚京字鎬仲南昌人有文集六卷

林紆字琴南號畏廬閩縣人光緒八年舉人少孤事母至孝幼嗜讀家貧不能藏書嘗得史漢殘本窮日夕讀之因悟文法後遂以文名壯渡海遊臺灣歸客杭州主東城講舍入京就五城學堂聘復主國學禮部侍郎郭曾忻以經濟特科薦辭不應生平任俠尙氣節嫉惡嚴見聞有不平輒憤起忠懇之誠發於至性念德宗以英主被扼每述及常不勝哀痛十謁崇陵側伏流涕逢歲祭雖風雪勿爲阻嘗蒙賜御書貞不絕俗頷威幸無極誓死必表於墓曰清處士憂時傷事一發之於詩文爲文宗韓柳少時務博覽中年後案頭唯有詩禮二疏左

史南華及韓歐之文此外則說文廣雅無他書矣其由博反約也如此其論文主意境識度氣勢神韻而忌率襲庸怪文必已出嘗曰古文唯其理之獲與道無悖者則味之彌臻於無窮若分畫秦漢唐宋加以統系派別爲此爲彼使讀者炫惑莫知所從則已格其途而左其趣經生之文樸往往流入於枯淡史家之文則又賸突恣肆無復規檢二者均不足以明道唯積理養氣偶成一篇類若不得已者必意在言先修其辭而峻其防外質而中膏聲希而趣永則庶乎其近矣紆所作務抑遏掩蔽能伏其光氣而其真終不可自閤尤善敘悲音吐悽梗令人不忍卒讀論者謂以血性爲文章不關學問也所傳譯歐西說部至百數十種然紆故不習歐文皆待人口達而筆述之任氣好辨自新文學興有倡非孝之說者奮筆與爭雖脅以威累歲不爲屈尤善畫山水渾厚冶南北於一爐時皆寶之紆講學不分門戶嘗謂清代學術之盛超越今古義理考據合而爲一而精博過之實於漢學宋學以外別荆清學一派時有請立清學會者紆撫掌稱善力贊其成甲子秋卒年七十有三門人私諡貞文先生有畏廬文



集詩集論文論畫等嚴復初名宗光字又陵一字幾道侯官人早慧嗜爲文閩督沈葆楨初創船政招試英俊儲海軍將才得復文奇之用冠其曹則年十四也既卒業從軍艦練習周歷南洋黃海日本窺臺灣保楨奉命籌防挈之東渡調敵勘測各海口光緒二年派赴英國海軍學校肄戰術及礮臺建築諸學每試輒最侍郎郭嵩燾使英賞其才時引與論析中西學術同異學成歸北洋大臣李鴻章方大治海軍以復總學堂二十四年詔求人才復被薦召對稱旨諭繕所擬萬言書以進未及用而政局猝變越二年避拳亂南歸是時人士漸傾向西人學說復以爲自由平等權利諸說山之未嘗無利脫靡所折衷則流蕩放佚害且不可勝言常於廣衆中陳之復久以海軍積勞敘副將盡棄去入貲爲同知累保道員宣統三年海軍部立特授協都統尋賜文科進士充學部名詞館總纂以碩學通儒徵爲資政院議員三年授海軍一等參謀官復殫心著述於學無所不窺舉中外治術學理靡不究極原委扶其失得證明而會通之精歐西文字所譯書以瓊辭達奧旨其天演論自序有曰仲尼之於六藝也易

春秋最嚴司馬遷曰易本隱而之顯春秋推見至隱此天下至精之言也始吾以爲本隱之顯者觀象繫辭以定吉凶而已推見至隱者誅意褒貶而已及觀西人名學則見其格物致知之事有內籀之術焉有外籀之術焉內籀云者察其曲而知其全者也執其微以會其通者也外籀云者援公理以斷衆事者也設定數以逆未然者也是固吾易春秋之學也遷所謂本隱之顯者外籀也所謂推見至隱者內籀也二者即物窮理之要術也夫西學之最爲切實而執其例可以御蕃變者名數質力四者之學而已而吾易則名數以爲經質力以爲律而合而名之曰易大字之內質力相推非質無以見力非力無以呈質凡力皆乾也凡質皆坤也奈端動之例三其一曰靜者不自動動者不自止動路必直速率必均而易則曰乾其靜也專其動也直有斯實塞爾者以天演自然言化其爲天演界說曰翁以合質闢以出力始簡易而終雜糅而易則曰坤其靜也翕其動也闢至於全力不增減之說則有自強不息爲之先凡動必復之說則有消息之義居其始而易不可見乾坤或幾乎息之旨尤與熱力平均天地

乃毀之言相發明也大抵古書難讀中國爲尤二千年來士徇利祿守闕殘無獨闢之慮是以生今日者乃轉於西學得識古之用焉凡復所譯著獨得精微皆類此世謂紆以中文溝通西文復以西文溝通中文並稱林嚴辛酉秋卒年六十有九著有文集及譯天演論原富羣學肄言穆勒名學法意羣已權界論社會通詮等同時有辜鴻生字鴻銘同安人幼學於英國爲博士遍遊德法意奧諸邦通其政藝年三十始返而求中國學術窮四子五經之奧兼涉羣籍爽然曰道在是矣乃譯四子書述春秋大義及禮制諸書西人見之始歎中國學理之精爭起傳譯庚子拳亂聯軍北犯湯生以英文草尊王篇申大義列強知中華以禮教立國終不可侮和議乃就張之洞周馥皆奇其才厯委辦議約滬浦等事旋爲外務部員外郎晉郎中擢左丞湯生論學以正誼明道爲歸嘗謂歐美主強權務其外者也中國主禮教修其內者也又謂近人欲以歐美政學變中國是亂中國也異日世界之爭必烈徵中國禮教不能弭此禍也湯生好辨善罵世國變後悲憤尤甚窮無所之日人聘講東方文化留東數年歸卒年

七十有二